

পদ্মাবতী নাটক ।




শ্রীমাইকেল মধুসূদন দত্ত

প্রণীতা



“চীর্ণতে বালিষ্ঠাপি সংক্ষেত্রপতিতা কৃষিঃ ।”

মুদ্রারক্ষসঃ ।



কলিকাতা ।

শ্রীযুক্ত ঈশ্বরচন্দ্র বসু কোং বহুবাজার ১৮২ সংখ্যক ভবন

ষ্ট্যান্‌হোপ যন্ত্রে প্রিন্ট ।

সন ১২৬৭ সাল ।

Acc. No. 10302

Shait Abdul Jabbar Kazi

P-3

Date- 29.3.96

Rashodulpure

Item No. B/B-4818

নাটোল্লিখিত ব্যক্তিগণ।

Don. By

ইন্দ্রনীল। (রাজা)।

মানবক। (বিদূষক)।

রাজমন্ত্রী।

দেবর্ষি নারদ।

মহর্ষি অশ্বিরা।

মাহেশ্বরীপুরীর রাজ-কঙ্কী।

ঐ পুরোহিত।

কলি।

সারথি।

—

শচীদেবী।

রতিদেবী।

মুরজাদেবী।

পদ্মাবতী।

বসুমতী। (সখা)।

মাধবী। (পরিচারিকা)।

গোতমী। (তপস্বিনী)।

রুজা। (অপ্সরী)।

—

নাগরিকগণ, রক্ষকগণ ইত্যাদি।

—

.

.

.

.

.

পদ্মাবতী নাটক ।

প্রথম অঙ্ক ।

প্রথম গর্ভাঙ্ক ।

বিক্র্যাগিরি ;—দেব উপবন ।

(ধর্ম্মরাজ হস্তে রাজা ইন্দ্রনীলের বেগে প্রবেশ ।)

রাজা । (চতুর্দিক্ অবলোকন করিয়া স্বগত) হরিণটা দেখতে দেখতে কোন দিকে গেল হে ? কি আশ্চর্য্য ! আমি কি নিদ্রায় আবৃত হয়ে স্বপ্ন দেখছি ? আর তাই বা কেমন করে বলি । এইত ভগবান্ বিক্র্যাচল অচল হয়ে আমার সম্মুখে রয়েছেন । (চিন্তা করিয়া) এই পর্বত ময় প্রদেশে রথের গতির রোধ হয় বল্যে, আমি পদব্রজে হরিণটার অনুসরণ-ক্লেশ স্বীকার করে, অবশেষে কি আমার এই ফল লাভ হলো যে আমি একলা একটা নির্জন বনে এসে পড়ল্যেয় ? মরুভূমিতে মরীচিকা বারিরূপে দর্শন দেয় ; তা এস্থলে কি সে মায়ায়ুগ হয়ে আমাকে এত বৃথা দুঃখ দিলে ? সে যাহোক, এখন এখানে কিঞ্চিৎকাল বিশ্রাম করে এ ক্রান্তি দূর করা আবশ্যিক । (পরিক্রমণ করিয়া) আহা ! স্থানটি কি রমণীয় ! বোধ করি এ কোন যক্ষ কিন্না গন্ধর্ব্বের উপবন হবে ।

প্রকৃতি, মানব জাতির লোচনানন্দের নিমিত্তে, এমন অপক্লপ রূপ কোথাও ধারণ করেন না । আমি এই উৎসের নিকটে শিলাতলে বসি । এ যেন কলকল রবে আমাকে আহ্বান কর্চে । (উপবেশন করিয়া সচকিতে) একি ? এ উদ্যান যে সহসা অপূর্ব্ব সুগন্ধে পরিপূর্ণ হতে লাগলো ? (আকাশে কোমল বাদ্য) আহা ! কি মধুরধ্বনি ! কি— (সহসা নিদ্রাবৃত হইয়া শিলাতলে পড়ন) ।

(শচী এক রত্নের প্রবেশ) ।

শচী । সখি, সুরপতির কল্প আর কেন জিজ্ঞাসা কর । তিনি দুষ্ট দৈত্য-বংশ কিসে সমূলে ধ্বংস হবে এই ভাবনায় সদা সর্বদাই ব্যস্ত থাকেন । তাঁর কি আর সুখভোগে মন আছে ? রতি-দেবি, তুমি কি ভাগ্যবতী । দেখ, তোমার মন্মথ তিলাক্ষের অস্ত্রও তোমার কাছ ছাড়া হন না । আহা ! যেমন পারিজাত

পুষ্পের আলিঙ্গন পাশে সৌরভমধু চির-
কাল বাঁধা থাকে, তোমার মদনও তেমনি
তোমার বশীভূত ।

রতি । সখি, তা সত্য বটে । বিরহ
অনল যে কাকে বলে তা আমি প্রায়
বিস্মৃত হয়েছি । (উভয়ের পরিক্রমণ)
কি আশ্চর্য্য ! শচীদেবী, ঐ দেখ তোমার
মালতী মলয়মাকুতের আগমনে যেন বিরক্ত
হয়ে তাকে নিকটে আসতে ইঙ্গিতে নিষেধ
কচে ।

শচী । করবেনা কেন ? দেখ, ইনি
সমস্ত দিন ঐ নিখিল সরোবরে নলিনীর
সঙ্গে কেলি করে কেবল এই এখানে
আসছেন । এতে কি মালতীর অভিমান
হয় না ? আর আপনার গায়ের গন্ধেই
ইনি আপনি ধরা পড়ছেন ।

(মুরজা দেবীর প্রবেশ ।)

কি গো, সখি মুরজা যে ? এস, এস ।
আজ তোমার এত বিরস বদন কেন ?

মুর । (দীর্ঘনিশ্বাস পরিত্যাগ করিয়া-
সখি, আমার দুঃখের কথা আর কাকে
বলবো !

রতি । কেন, কেন ? কি হয়েছে ?

মুর । প্রায় পনের বৎসর হলো
পার্বতী আমার কণ্ঠা বিজয়াকে পৃথিবীতে
জন্মগ্রহণ কতে অভিশাপ দেন ; তা সেই
অবধি তার আর কোন অনুসন্ধান পাই
নাই ।

শচী । সে কি ? ভগবতী পৃথিবী
না তাকে স্বর্গভে ধারণ কতে স্বীকার
পেয়েছিলেন ?

মুর । হাঁ—পেয়েছিলেন আর ধরেও
ছিলেন বটে । কিন্তু তার জন্ম হলো তাকে
যে লালন পালনের জন্তে কার হাতে দিয়ে-
ছেন এ কথাটা তিনি কোনমতেই আমাকে

বলতে চাননা । আমি আজ তাঁর পায়ে
ধরে যে কত কেঁদেছি, তা আর কি
বলবো ?

রতি । তা ভগবতী তোমাকে কি
বললেন ?

মুর । তিনি বললেন—“বৎসে, সময়ে
তুমি আপনিই সকল জানতে পারবে ।
এখন তুমি রোদন সম্বরণ করে অলকায়
যাও । তোমার বিজয়া পরমস্থখে আছে ।”

শচী । তবে, সখি, তোমার এ বিষয়ে
চঞ্চল হওয়া কোনমতেই উচিত হয় না ।
আর বিবেচনা করে দেখ, পৃথিবীতে
মানুষের জীবনলীলা জলবিশ্বের মতন অতি
শীঘ্রই শেষ হয় ।

মুর । সখি, বিজয়ার বিরহে আমার
মন থেকে থেকে যেন কেঁদে উঠে ! হায় !
জগদীশ্বর আমাদের অমর করেও দুঃখের
অধীন কল্যে ।

শচী । সখি, বিধাতার এ বিপুল
সৃষ্টিতে এমন কোন ফুল আছে যে তাতে
কীট প্রবেশ কতে না পারে ?

(দূরে নারদের প্রবেশ) ।

নার । (স্বগত) আমি মহর্ষি পুল-
স্ত্যের আশ্রমে শূন্যপথ দিয়ে গমন করতে-
ছিলেম । অকস্মাৎ এই দেব উপরনে এই
তিনটা দেবনারীকে দেখে ইচ্ছা হলো যে
যেমন করে পারি এদের মধ্যে কোন কলহ
উপস্থিত করাই—এই জন্তেই আমি এই
পর্কত সানুতে অবতীর্ণ হয়েছি । তা
আমার মনস্বামনাটি কি সুযোগে সুসিদ্ধ
করি ? (চিন্তা করিয়া) হাঁ, হয়েছে ।
এই যে সুবর্ণ পদ্মটি আমি মানস সরোবর
থেকে অবচয়ন করে এনেছি, এর দ্বারাই
আমার কার্য সফল হবে । (অগ্রসর
হইয়া) আপনাদের কল্যাণ হউক !

সকলে । দেবর্ষি, আমরা সকলে আপনাকে অভিবাদন করি । (প্রণাম) ।

শচী । (স্বগত) এ হতভাগা ত সর্বত্রই বিবাদের মূল, তা এ আবার কোত্থেকে এখানে এসে উপস্থিত হলো ?—ও মা ! আমি এ কি কচ্চি ? ও যে অস্ত্রধারী । ও আবার এ সকল মনের কথা টের পেলে কি আর রক্ষা আছে । (প্রকাশে) ভগবন, আজ আমাদের কি শুভদিন ! আমরা আপনার শ্রীচরণ দর্শন করে চরিতার্থ হলোম্ । তবে আপনার কোথায় গমন হচ্চে ?

নার । (স্বগত) এ ছুটা স্ত্রীটার কিছু-মাত্র লজ্জা নাই । এ কি ? এর যে উদরে বিষ, মুখে মধু । এ যে মাকালফল । বর্ণ দেখলে চক্ষু শীতল হয়, কিন্তু ভিতরে—ভস্ম ! তা আমার যে পর্য্যন্ত সাধ্য থাকে একে যথোচিত দণ্ড না দিয়ে এ স্থান হতে কোন মতেই প্রস্থান করা হবে না । (প্রকাশে) আপনাদের চন্দ্রানন দর্শন করায় আমি পরমসুখী হলোম্ । আমার কথা আর কেন জিজ্ঞাসা করেন ? আমি এক ষোরতুর বিপদে পড়ে এই ত্রিভুবন পর্য্যটন করে বেড়াচ্ছি ।

রতি । বলেন কি ?

তার । আর বলবো কি ? কয়েক দিন হলো আমি কৈলাসপুরীতে হরগৌরী দর্শন করে আপন আশ্রমে প্রত্যাগমন কচ্ছিলোম, এমন সময়ে দৈবমায়ায় তৃষ্ণাতুর হয়ে মানস সরোবরের নিকট উপস্থিত হলোম্—

শচী । তার পর, মহাশয় ?

নার । সরোবর তীরে উপস্থিত হয়ে দেখলেম যে তার সলিলে একটি কনকপদ্ম ফুটে রয়েছে ।

রতি । দেবর্ষি, তার পর কি হলো ?

নার । আমি পদ্মটির সৌন্দর্য দেখে

তৃষ্ণা পীড়া বিস্মৃত হয়ে অতি যত্ন করে তুলেলেম ।

সকলে । তার পর ? তার পর ?

নার । তৎক্ষণাত্ আকাশমার্গে এই দৈববাণী হলো—“হে নারদ, এ ভগবতী পার্শ্বতীর পদ্ম ; একে অবচয়ন করা তোমার উচিত কৰ্ম্ম হয় নাই । এক্ষণে এ ত্রিভুবন মধ্যে যে নারী সর্বাপেক্ষা পরমসুন্দরী তাকে এ পুষ্প না দিলে তুমি গিরিজার ক্রোধানলে দগ্ন হবে ।”—হায় ! এ কি সামান্য বিপদ !—

শচী । (সহাস্ত বদনে) ভগবন, আপনি এ বিষয়ে আর উদ্বিগ্ন হবেন না । আপনি এ পদ্মটি আমাকেই প্রদান করুন না কেন ?

মুর । কেন, তোমাকে প্রদান করবেন কেন ? দেবর্ষি, আপনি এ পদ্মটি আমাকে দিউন ।

রতি । মুনিবর, আপনিই বিবেচনা করুন । এ দেবনির্ঘ্রিত কনকপদ্মের উপযুক্ত পাত্রী আমাপেক্ষা ত্রিভুবনে আর কে আছে ?

নার । (স্বগত) এইত আমার মনস্কামনা সিদ্ধ হলো । তা এ ষোরতুর আগেই আমার এখান থেকে প্রস্থান করা শ্রেয়ঃ । (প্রকাশে) আপনাদের এ বিষয়ে আমাকে অনুরোধ করা উচিত হয় না । দেখুন, আমি বৃদ্ধ, বনচারী তপস্বী—আপনারা সকলেই দেবনারী । আপনাদের মধ্যে যে কে সর্বাপেক্ষা সুন্দরী, এ কথার নির্ঘণ্ট করা আমার সাধ্য নয় । অতএব এই কনকপদ্ম ভগবান্ বিদ্যাচলের শৃঙ্গের উপর রাখলেম, আপনাদের মধ্যে যিনি পরমসুন্দরী, তিনি ব্যতীত আর কেউ এ পুষ্পস্পর্শ করবামাত্রই তাঁকে পাষণ্ড-মুক্তি ধরে এই উপবনে সহস্র বৎসর

থাকতে হবে ।
হলোয়ম্ ।

একপে বিদায়

[প্রস্থান ।

শচী । (ঈষৎ কোপে) তোমাদের
মতন বেহায়া স্ত্রী কি আর আছে ?

উভয়ে । কেন ? বেহায়া আবার
কিসে দেখলে ?

শচী । কেন আবার জিজ্ঞাসা কর ?
তোমাদের অহঙ্কার দেখলে ভয় হয় ? আই
মা ! কি লজ্জার কথা ! তোমাদের কি
আমার কাছে এত দর্প করা সাজে ?

উভয়ে । কেন, কেন ? আমরা কি
দর্প করেছি ?

শচী । তোমরা কি জান না যে আমি
ইন্দ্রের ইন্দ্রাণী ।

মুর । ইঃ, তা হলেই বা ! তুমি কি
জান না যে আমি যজ্ঞধরের প্রণয়িনী
মুরজা ।

রতি । তোমাদের কথা শুনে হাসি
পায় । তোমরা কি ভুললে যে, যে অনঙ্গ-
দেব সমস্ত জগতের মন মোহন করেন,
আমি তাঁর মনোমোহিনী রতি ।

শচী । আঃ, তোমার মন্থখের কথা
আর কইও না । হরের কোপানলে দক্ষ
হওয়া অবধি তাঁর আর কি আছে ?

রতি । কেন, কি না আছে ? তুমি
যদি আমাকে আমার মন্থখের কথা কইতে
বার্ণ কর, তবে তুমিও তোমার ইন্দ্রের
নাম আর মুখে এনে না । তোমার প্রতি
যে সুরপতির কত অনুরাগ তা সকলেই
জানে । তা তোমার প্রতি এত অনুরাগ
না থাকলে কি তিনি আর সহস্রলোচন
হতেন ।

শচী । (সরোষে) তোর এত বড়
যোগ্যতা ? তুই সুরেন্দ্রের নিন্দা করিস ?
তোর মুখ দেখলে পাপ হয় ।

(অদৃশ্যভাবে নারদের পুনঃ প্রবেশ ।)

নার । (স্বগত) আহা ! কি কন্দলই
বাধিয়েছি । ইচ্ছা করো যে বীণাধ্বনি করে
একবার আছাদে হাত তুলে নৃত্য করি ।
(চিত্তা করিয়া) যা হউক, এ দুর্জয়
কোপাঘ্নি এখন নিৰ্বাণ করা উচিত ।

[প্রস্থান ।

মুর । আঃ, মিছে ঝগড়া কর কেন ?
আকাশে । হে দেবনারীগণ ! তোমরা
কেন এ রুখা বিবাদ করে দেবসমাজে নিন্দ-
নীয় হবে ? দেখ, ঐ উৎসের সমীপে
শিলাতলে বিদর্ভনগরের রাজা ইন্দ্রনীল
রায় সুপ্তভাবে আছেন । তোমরা এ বিষয়ে
ওঁকে মধ্যস্থ মান ।

মুর । ঐ শুনলে ত ? আর স্বন্দে
কাজ কি ? এস, রাজা ইন্দ্রনীল রায়কে
জাগান যাক্গে ।

শচী । রাজা ইন্দ্রনীল আমার মায়ায়
নিদ্রারত হয়ে রয়েছে । এস, আমরা ঐ
শিখরের কাছে দাঁড়িয়ে মহারাজকে মায়া-
জাল হতে মুক্ত করি ।

[সকলের প্রস্থান, আকাশে কোমল বাদ্য ।

রাজা । (গাত্রোথান করিয়া স্বগত)
আহা ! কি চমৎকার স্বপ্নটাই দেখতে-
ছিলেম । (দীর্ঘনিশ্বাস পরিত্যাগ করিয়া)
হে নিদ্রাদেবী, আমি কি অপরাধ করেছি
যে তুমি এ সময়ে আমার প্রতি এত প্রতি-
কূল হলে ? হায় ! আমি সশরীরে স্বর্গ-
ভোগ কতো আরম্ভ করবামাত্রই তুমি
আমাকে আবার এ দুর্জয় সংসারজালে
টেনে এনে ফেললে ? জননি, এ কি
মায়ের ধর্ম !—আহা ! কি চমৎকার
স্বপ্নটাই দেখেছিলেম ! বোধ হলো যেন
আমি দেবসভায় বসে অপ্সরীগণের মনো-
হর সঙ্গীত শ্রবণ করতেছিলাম, আর চতু-
র্দিক থেকে যে কত সৌরভমুখা বৃষ্টি হতে-

ছিল, তা বর্ণনা করা মনুষ্যের অসাধ্য কৰ্ম্ম । (সচকিতে) এ আবার কি ? এঁরা সকল কে ? দেবী কি মানবী ?

(শচী, মুরজা এবং রতির পুনঃ প্রবেশ ।)

তা এঁদের অনিমেষ চক্ষু আর ছায়া-হীন দেহ এঁদের দেবত্ব সন্দেহ দূর না কলো, এঁদের অপরূপ রূপ লাভণ্যে আমার সে সংশয় ভঞ্জন হতো । নলিনীর আভ্রাণ পেলে অন্ধ ব্যক্তিও জানতে পারে যে নলিনীই তার নিকট ফুটে রয়েছে । এমন অপরূপ রূপ লাভণ্য কি ভূমণ্ডলে সম্ভবে ?

শচী । মহারাজের জয় হউক ।

মুর । মহারাজ দীর্ঘায়ু হউন ।

রতি । মহারাজের সর্বত্র মঙ্গল হউক ।

শচী । হে মহীপতে, আমি ইন্দ্রাণী

শচী ।

মুর । মহারাজ, আমি যক্ষরাজপত্নী মুরজা ।

রতি । নরেশ্বর, আমি মন্থপ্রণয়িনী রতি ।

শচী । (জনান্তিকে মুরজা এবং রতির প্রতি) এক জনকে কথা কহিতে দাও—এত গোল কর কেন ? এমন কল্যে কি কৰ্ম্ম সিদ্ধ হবে ?

রাজা । (প্রণাম করিয়া) আপনাদের শ্রীচরণ দর্শন করে আমার জন্ম সার্থক হলো । তা আপনারা এ দাসের প্রতি কি আঞ্জা করেন ?

শচী । মহারাজ, ঐ যে পর্বতশৃঙ্গের উপর কনকপদ্মটি দেখতে পাচ্যেন, ঐটি আমাদের তিন জনের মধ্যে আপনি যাকে সর্বাপেক্ষা পরমহুন্দরী বিবেচনা করেন, তাকেই প্রদান করুন !

রতি । মহারাজ, শচীদেবী যা বল-

লেন, আপনি তা ভাল করে বুঝলেন ত ?
—যে সর্বাপেক্ষা পরমহুন্দরী—

শচী । আরে, এত গোল কর কেন ?

রাজা । (স্বগত) এ কি বিষম বিভ্রাট ! এঁরা সকলেই ত দেবনারী দেখছি, তা এঁদের মধ্যে কাকে তুষ্টি কাকেই বা রুষ্টি করবো । (প্রকাশে) আপনারা এ বিষয়ে এ দাসকে মার্জনা করুন ।

শচী । তা কখনই হবে না । আপনি পৃথিবীতে ধর্ম্ম অবতার । আপনাকে অবশ্যই এ বিচার কতো হবে ।

মুর । এ মীমাংসা আপনি না কল্যে আর কে করবে ?

রতি । তা এতে আপনার ভয় কি ? আপনি একবার আমাদের দিকে চেয়ে দেখলেই ত হয় ।

রাজা । (স্বগত) কি সর্বনাশ ! আজ্ যে আমি কি কুলগেই যাত্রা করে-ছিলাম তা আর কাকে বলবো ।

শচী । নরনাথ, আপনি যে চুপ করে রইলেন । এ বিষয়ে কি আপনার মনে কোন সংশয় হয় ? দেখুন, আমি সুরেন্দ্রের মহিষী, আমি ইচ্ছা কল্যে আপনাকে এই মুহূর্ত্তেই সমাগরা পৃথিবীর ইন্দ্রত্বপদে নিযুক্ত কতো পারি ।

মুর । শচীদেবি, এ, সখি, তোমার বৃথা গর্ক । দেখ, তোমরা প্ৰবল দৈত্যকুলের ভয়ে অমরাবতীতে দিবা রাত্রি যেন মরে থাক ; তা তুমি আবার সমাগরা পৃথিবীর ইন্দ্রত্ব কোত্ থেকে দেবে গা ? (রাজার প্রতি) হে নরেশ্বর, আপনি বিবেচনা করুন, আমি ধনেশ্বরের ধর্ম্মপত্নী ; এ বহু-মতী আমারই রত্নাগার,—এতে যত অমূল্য রত্নরাজি আছে, আমি সে সকলের অধিকারিণী ।

পদ্মাবতী নাটক ।

রতি । (স্বগত) বাঃ, এঁরা দুজনেই দেখ্‌চি বিচারকর্তাকে ঘুম খাওয়াতে উদ্যত হলেন, তবে আমি আর চুপ্‌করে থাকি, কেন ? (প্রকাশে) মহারাজ, ইন্দ্রতপদের যে কি সুখ তা সুরপতিই জানেন । পক্ষিরাজ বাজ সদর্পে উন্নত পক্ষিত শৃঙ্গে বাস করে বটে । কিন্তু ঝড় আর স্তম্ভ হলে সকলের আগে তারই সর্বনাশ হয় । আর ধনের কথা কি বলবো ? যে ফণীর মস্তকে মণি জন্মে, সে সর্বদাই বিবরে লুক্‌য়ে থাকে । আর যদি কখন ক্ষুধাতুর হয়ে ঘোরতর অন্ধকার রাত্রেও বাইরে আসে, তবে তার মণির কাস্তি দেখে কে তার প্রাণ নষ্ট কতো চেষ্টা না করে ? আরও দেখুন, ধন উপার্জনে যার মন, তার অবশেষে তুত্‌পোকাকার দশা ঘটে । এই নিরোধ কীট অনেক পরিশ্রমে একখানি উত্তম গৃহ নির্মাণ কর্যে তার মধ্যে বদ্ধ হয়ে, ক্ষুধাতৃষ্ণায় প্রাণ হারায়, পরে পট বস্ত্র অত্র লোকে পরে ।

শচী । আহা ! রতিদেবীর কি সূক্ষ্ম বুদ্ধি গা ! তবে এ পৃথিবীতে সুখী কে ?

রতি । তা তুমি কেমন করে জানবে ? আমার বিবেচনার মধুকর সর্সাপেক্ষা সুখী । পুষ্পকুলের মধুপান ভিন্ন তার আর কোন কৰ্মই নাই । তা মহারাজ, এ পৃথিবীতে মত পুষ্পস্বরূপ অঙ্গনা বিক-
শিত হয়, তারা সকলেই আমার সেবিকা ।

রাজা । (স্বগত) এখন আমার কি করা কর্তব্য ? এ বিপদ হতে কিম্বে রিত্রাণ পাই ?

শচী । হে নরনাথ, আপনার এ বিষয়ে বিলম্ব করা উচিত হয় না ।

রাজা । যে আজ্ঞা । (কনকপদ্ম গ্রহণ করিয়া) আপনারা স্বেচ্ছাক্রমে আমাকে এ বিষয়ে মধ্যস্থ মেনেছেন, তা

এতে আমার বিবেচনার যা যথার্থ বোধ হয়, আমি তা কল্যে ত আপনাদের মধ্যে কেউ আমার প্রতি বিরক্ত হবেন না ?

সকলে । তা কেন হবো ?

রাজা । তবে আমি এ কনকপদ্ম রতিদেবীকে প্রদান করি । আমার বিবে-
চনায় মন্থমনোমোহিনী রতিদেবীই বামা-
দলের ঈশ্বরী (রতিকে পদ্ম প্রদান ।)

শচী । (সরোষে) রে ছুষ্ট মানব, তুই কামের বশ হয়ে ধর্ম নষ্ট করলি ? তা তোকে আমি এ নিমিত্তে যথোচিত দণ্ড দিতে কোন মতেই ক্রটি করবো না ।

[প্রস্থান ।

মুর । (সরোষে) তুই রাজকুলে, জন্মগ্রহণ করে, স্ত্রীলোভে চণ্ডালের কৰ্ম করলি ? তা তুই যে কালক্রমে এর সমুচিত শাস্তি পাবি, তার কোন সংশয় নাই ।

[প্রস্থান ।

রতি । (প্রকুল্ল বদনে) মহারাজ, আপনি এ বিষয়ে কোনমতেই শঙ্কিত হবেন না । আমি আপনাকে রক্ষা করবো, আর আপনার যথাবিধি পুরস্কার কতোও ভুলবো না । আপনি আমার আশীর্বাদে পরম সুখভোগী হবেন । এখন আমি বিদায় হই ।

[প্রস্থান ।

রাজা । (স্বগত) বিধাতার নির্দয় কে খণ্ডন কতো পারে ? তা পরে আমার অদৃষ্টে যা থাকে তাই হবে ; এখন যে এ ঝঙ্কারটা মিটে গেল, এতেই বাঁচলোম্ । শচী আর মুরজা যে আমাকে ক্রোধানলে ভষ্ম কর্যে যায় নাই, এই আমার পরম

(সারথির প্রবেশ ।)

সার । মহারাজের জয় হউক । দেব
আপনার রথ প্রস্তুত ।

রাজা । সে কি ? তুমি এ পর্বত
প্রদেশে কথ কি প্রকারে আনলে ?

সার । (কৃতাজলিপুটে) মহারাজ,
আপনার প্রসাদে এ দাসের পক্ষে অতি
সামান্য কর্ম ।

রাজা । তা রথ এখানে এনে ভালই
করেছ । আমি এই ভগবান্ বিক্যাচনের
মতন্ প্রায় অচল হয়ে পড়েছি । আর্ঘ্য
মানবক কোথায় ?

সার । আজ্ঞা—তিনি মহারাজের
অবেশনে ইতস্ততঃ ভ্রমণ করে বেড়াচেন ।

নেপথ্যে । ও—হো !—হে !
—হে !

রাজা । সারথি, তুমি রথের নিকটে
গিয়ে আমার অপেক্ষা কর । আমি মানব-
ককে সঙ্গে করে আনি ।

সার । যে আজ্ঞা, মহারাজ ।

[প্রস্থান ।

রাজা । (স্বগত) দেখি মানবক
এখানে একলা এসে কি করে । এমন
নিভৃত স্থলে ওর মতন্ ভীক্ মনুষ্যকে ভয়
দেখান অতি সহজ কর্ম । (পর্বতান্তরালে
অবস্থিতি) ।

(বিদূষকের প্রবেশ ।)

বিদু । (স্বগত) দূর কর মেনে !
এ কি সামান্য যজ্ঞা । ওরে নির্ভূর পেট,
তুই এ অর্নর্থের মূল । আমি যে এই হাবাতে
রাজাটার পাছে পাছে ওর ছায়ার মতন্
ফিরে বেড়াই, সে কেবল তোর জালায়
বৈ ত নয় । এট দেখ, এই পাহাড়ে দেশে
হেঁটে হেঁটে আমি খোঁড়া হয়ে গেলেম ।
(ভূতলে উপবেশন করিয়া) হায়, এই যে

ব্রাহ্মণের পাদপদ্ম, এর চিহ্ন স্বয়ং পুরুষো-
ত্তম কত প্রযত্নে আপনার বক্ষঃস্থলে ধারণ
করেন ! তা দেখ, এ পাথরের চোটে
একেবারে যেন িঁড়ে গেছে । উঃ, এক-
বার রক্তের স্রোতের দিকে চেয়ে দেখ,
যেন প্রবালের রুষ্টিই হচ্ছে । রে দুষ্ট
বিক্যাচল, তোর কি দয়ার লেশমাত্রও নাই ।
আর কোত্থেকেই বা থাকবে । তোর
শরীর যেমন পাষণ, তোর হৃদয়ও তেমনি
কঠিন । ওরে অধম, তোর কি ব্রহ্মহত্যা-
পাপের ভয় নাই ?

নেপথ্যে । (তর্জন গর্জন শব্দ) ।

বিদু । ও বাবা ! এ আবার কি ?
পর্বত টা রেগে উঠলো না কি ?

নেপথ্যে । (তর্জন গর্জন শব্দ) ।

বিদু । (সত্রাসে) কি সর্বনাশ !
(ভূতলে জানুদ্বয় নিষ্ক্রেপ করিয়া প্রকাশে)
হে ভগবন্ বিক্যাচল, তুমি আমার দোষ
এবার ক্ষমা কর । প্রভু, আমি তোমার
পায়ে পড়ি । আমি এই নাক কাণ মলে
বলছি, আমি তোমাকে আর এ জন্মেও
নিন্দা করবো না । হিমাদ্রিকে অচলেন্দ্র
কে বলে ? তুমিই পর্বতকূলের শিরো-
মণি ! (গাত্রোখান এবং চিন্তা করিয়া
স্বগত) দূর, আমার আজ্ কি হয়েছে ।
আমি এক টুতে এত ডরালেম যে ? বোধ
করি, ও শব্দটা কেবল প্রতিধ্বনি মাত্র ।

নেপথ্যে ।—ধ্বনিমাত্র ।

বিদু । (সচকিতে) এ আবার কি ?
এ যে যথার্থই প্রতিধ্বনি । তা পর্বত
প্রদেশই ত প্রতিধ্বনির জন্মস্থান । দেখি
এর সঙ্গে কেন কিকিৎ আলাপই করি না
(উচ্চস্বরে) ওলো প্রতিধ্বনি ?

নেপথ্যে ।—পিরীতের ধনি ।

বিদু । ওলো তুই আবার কোত-
থেকে লো ?

পদ্মাবতী নাটক।

নেপথ্যে।—কে লো?

বিদ্। তুই লো।

নেপথ্যে। তুই লো।

বিদ্। মর, তোর মুখে ছাই।

নেপথ্যে।—মুখে ছাই।

বিদ্। কার মুখে লো? আমার মুখে
কি তোর মুখে?

নেপথ্যে।—তোর মুখে।

বিদ্। বাহবা। বাহবা।

নেপথ্যে।—বোবা।

বিদ্। মর গস্তানি, তুই আমাকে
গাল দিল।

নেপথ্যে।—ইস।

বিদ্। যা, এখন যা।

নেপথ্যে।—আঃ।

বিদ্। ও কি লো? তোর কি
আমাকে ছেড়ে যেতে মন চায় না লো।

নেপথ্যে।—না লো।

বিদ্। দর মাগি, তুই এখন গলে
কাঁচি।

নেপথ্যে।—আঁ—ছি।

বিদ্। মাগীকে তাড়বার কোন
উপায়ই দেখি না।

নেপথ্যে।—না।

বিদ্। বটে? তবে এই দেখ। (মুখা-
বৃত্ত করিয়া শিলাতলে উপবেশন)।

(রাজার পুনঃ প্রবেশ।)

রাজা। (স্বগত) আমাকে যে আজ
কত বেশ ধরতে হচে তা বলা দুস্কর।
আমি এই উপবনে নিষাদরূপে প্রবেশ
করে প্রথমতঃ দেবদেবীদ মধ্যস্থ হলেম;
তার পরে আবার প্রতিধ্বনিও হলেম;
দেখি, আরও কি হতে হয়। (পর্কতান্ত-
রালে অবস্থিতি)।

বিদ্। (মুখ মোচন করিয়া স্বগত)
মাগি গেছে ত। ওলো প্রতিধ্বনি তুই

কোথায় লো। রাম বলো, আপদ গেছে।

(চতুর্দিক অবলোকন করিয়া) আহা!

ফোয়ারাটী কি সুন্দর দেখ! এমন জল

দেখলে শীতকালেও তৃষ্ণা পায়। তা আমার

যে এক দৃঢ় প্রতিজ্ঞা আছে যে কিছু আহার

না করে কখনই জল খাব না। কি আশ্চর্য!

ঐ যে একটা উত্তম পাকা দাড়িম্ব দেখতে

পাচ্ছি। তা এ নির্জন স্থানে একজন

সম্বংশজাত ব্রাহ্মণকে কিছু ফলাহারই

করাইনে কেন? (দাড়িম্বগ্রহণ)।

নেপথ্যে। রে দুষ্ট তস্কর, তুই কি
জানিসনা যে এ দেব উপবন যক্ষরাজের
রক্ষিত।

বিদ্। (সত্রাসে স্বগত) ও বাবা!

এ আবার মাটা খেয়ে কি করে বস্লেম।

নেপথ্যে। ওরে পাষণ্ড, আমি এই
তোমর মস্তকচ্ছেদন কতো আস্ছি। (হু-
কার ধ্বনি)।

বিদ্। (সত্রাসে ভূতলে জানুদ্বয়
নিক্ষেপ করিয়া প্রকাশে) হে যক্ষরাজ,
আপনি এবার আমাকে রক্ষা করুন। আমি
একজন অতি দরিদ্র ব্রাহ্মণ, পেটের দায়েই
এ কন্সটা করেছি।

নেপথ্যে। হা মিথ্যাবাদি, যার ব্রাহ্মণ-
কুলে জন্ম সে মহাস্বা। কি কখন পরধন
অপহরণ করে?

বিদ্। (সত্রাসে) হে যক্ষরাজ, আমি
আপনার মাথা খাই যদি মিথ্যা কথা কই।
আমি যথার্থই ব্রাহ্মণ। তা আমি আপনার
নিকটে এই শপথ কচি যে, যদি আর
কখন পরের দ্রব্য চুরি করি, তবে যেন
আমি সাতপুরুষের হাড় খাই। আমি এই
নাকে ধত্ দিয়ে বল্চি—

নেপথ্যে। দে, ধত্ দে।

বিদ্। (ধত্ দিয়া) আর কি কতো
আজ্ঞা করেন বলুন।

নেপথ্যে । তুই এ স্থলে কি নিমিত্তে এসেছিস্ ?

বিদু । (স্বগত) বাঁচলেম্ ! আর যে কত ফল চুরি করে খেয়েছি, তা জিজ্ঞাসা কল্যে না । (প্রকাশে) যক্ষরাজ, আর দুঃখের কথা কি বলবো । আমি বিদর্ভ-নগরের রাজা ইন্দ্রনীলের -সঙ্গে আপনার উপবনে এসেছি ।

নেপথ্যে । সে কি ? বিদর্ভনগরের ইন্দ্রনীল রায় যে অতি নির্ভুর ব্যক্তি । সে না তার প্রজাদের অত্যন্ত পীড়ন করে ?

বিদু । আপনি দেখ্ছি সকলই জানেন, তা আপনাকে আমি আর অধিক কি বলবো । রাজা বেটা রেয়েতের কাছে যখন যা দেখে, তখনই তাই লুটেপুটে ছায় ।

নেপথ্যে । বটে ? সে না বড় অসৎ ।

বিদু । মহাশয়, ও কথা আর বলবেন না,—ওর রাজ্যে বাস করা ভার, বেটা রাবণের পিতামহ ।

নেপথ্যে । বটে ? রাজার কয় সংসার ?

বিদু । আচ্ছা বেটা এখনও বিয়ে করে নি ।

নেপথ্যে । কেন ?

বিদু । মহাশয়, বেটা কৃপণের শেষ । পয়সা খরচ হবে বল্যে বিয়ে করে না ।

(রাজার পুনঃ প্রবেশ) ।

রাজা । কি হে স্বিজবর, এ সকল কি সত্য কথা ? আমি প্রজাপীড়ন করি ? আমি দশানন অপেক্ষাও ছুরাচার ? আমি কি অর্থব্যয় হবে বল্যে বিবাহ করি না ?

বিদু । কি সর্বনাশ ! এ ত যক্ষরাজ নয়, এ যে রাজা ইন্দ্রনীল । তা এখন কি করি ? একে যে গালাগালি দিছি, বোধ করি মেরে হাড় ভেঙ্গে দেবে এখন ।

রাজা । কি হে সখে মানবক, তুমি

যে চুপ করে রইলে ? এখন আমার উচিত যে আমিই তোমার মস্তকচ্ছেদ করি ।

বিদু । হাঃ ! হাঃ ! হাঃ ! (উচ্চ-হাস্য) ।

রাজা । ও কি ও, হেসে উড়িয়ে দিতে চাও না কি ?

বিদু । হাঃ ! হাঃ ! হাঃ ! (উচ্চ-হাস্য) ।

রাজা । মরমূর্খ । তুই পাগল হলি না কি ?

বিদু । হাঃ ! হাঃ ! হাঃ ! বয়স, আপনি কি বিবেচনা করেন যে আমি আপনাকে চিন্তে পেরেছিলেম্ না । হাঃ ! হাঃ ! হাঃ !

রাজা ! বল দেখি, কিসে চিন্তে পেরেছিলি ?

বিদু । মহারাজ, হাতির গর্জন শুনে কি কেউ মনে করে যে কোলা ব্যাঙ ডাক্চে । সিংহের হুঙ্কার শব্দ কি গলা-ভাঙ্গা গাধার চীৎকার বোধ হয় । হাঃ ! হাঃ ! হাঃ ! (উচ্চহাস্য) ।

রাজা । ভাল, তবে তুমি আমাকে এত নিন্দা কল্যে কেন ?

বিদু । বয়স, পাপকর্ম কল্যে তার ফল এ জন্মেও ভোগ কতো হয় ! দেখুন, আপনি একজন সদ্ব্রাহ্মণকে ভয় দেখিয়ে তাকে কষ্ট দিতে উদ্যত হয়েছিলেন, তার জন্তেই আপনাকে নিন্দাস্বরূপ কিকিৎ তিত্ত বারি পান কতো হলো ।

রাজা । (সহাস্য বদনে) সখে, তোমার কি অগাধু বুদ্ধি । সে যা হউক, আমি যে আজ এ উপবনে কত অল্পত ব্যাপার দেখেছি, তা তুমি শুন্দলে অবাক হবে ।

বিদু । কেন মহারাজ ? কি হয়েছিল, বলুন দেখি ?

রাজা। সে সকল কথা এ স্থলে বক্তব্য নয়। চল, এখন দেশে যাই। সে সব কথা এর পরে বলবো।

বিদু। তবে চলুন। (কিকিং পরি-ক্রমণ করিয়া অবস্থিতি।)

রাজা। ও আবার কি? দাঁড়ালে কেন?

বিদু। বয়স্শ, ভাব্চি কি—বলি যদি এখানে যক্ষরাজ নাই, তবে ও পাকা দাড়িমটা ফেলে যাব কেন?

রাজা। (সহাস্তবদনে) কে ফেলে যেতে বল্চে? নাও না কেন?

বিদু। যে আজ্ঞা। (দাড়িম গ্রহণ)।

রাজা। চল, এখন যাই। যদি যক্ষ-রাজ যথার্থই এসে উপস্থিত হন, তবে কি হবে?

বিদু। আজ্ঞা হাঁ—এ বড় মন্দ কথা নয়; তবে শীঘ্রই চলুন।

[উভয়ের প্রস্থান।

ইতি প্রথমাস্ক।

দ্বিতীয়াস্ক।

প্রথম গর্ভাস্ক।

মাহেশ্বরী—রাজসুদাস্তসংক্রান্ত উদ্যান।

(পদ্মাবতী এবং সখীর প্রবেশ।)

পদ্মা। (আকাশে দৃষ্টিপাত করিয়া) সখি, সূর্য্যদেব অস্তে গেছেন বটে, কিন্তু এখনও একটু রোদ্দ আছে।

সখী। প্রিয়সখি, তবুও দেখ, ঐ না একটা তারা আকাশে উঠেছে?

পদ্মা। ওকে কি তুমি চেন না, সখি? ঐ যে ভগবতী রোহিণী। চন্দ্রের বিরহে

ওঁর মন এত চঞ্চল হয়েছে, যে উনি সাজ্জায় জলাঞ্জলি দিয়ে তাঁর আসবার আগেই একলা এসে তাঁর অপেক্ষা কচেন।

সখী। প্রিয়সখি, তা যেন হলো, কিন্তু একবার এ দিকে চেয়ে দেখ। কি চমৎকার!

পদ্মা। কেন, কি হয়েছে?

সখী। ঐ দেখ, মধুকর তোমার মাল-তীর মধুপান কতো এসেছে, কিন্তু মলয়মারুত যেন রাগ করেই ওকে এক মুহূর্তের জন্তেও স্থির হয়ে বসতে দিচেন না। আর দেখ, ওরও কত লোভ। ওকে যতবার মলয় তাড়াচেন, ও ততবার ফিরে ফিরে এসে বস্চে।

পদ্মা। সখি, চল দেখিগে, চক্রবাকী তার প্রাণনাথকে বিদায় করে, এখন একলা কি কচেন।

সখী। প্রিয়সখি, তাতে কাজ নাই। বরঞ্চ চল দেখিগে কুমুদিনী আজ্ কেমন বেশ করে তার বাসরঘরে চন্দ্রের অপেক্ষা কচেন!

পদ্মা। সখি, যে ব্যক্তি সুখী, তার কাছে গেলেই বা কি, আর না গেলেই বা কি? কিন্তু যে ব্যক্তি দুঃখী, তার কাছে গিয়ে দুটা মিষ্ট কথা কইলে তার মন অবশ্যই প্রফুল্ল হয়। আমি দেখেছি যে উচ্চস্থলে রূপিধারা পড়লে, জলটা অতিনীচ বেগে চলে যায়, কিন্তু যদি কোন মরুভূমি কখন জলধরের প্রসাদ পায়, তবে সে তা শুষ্কগাং ব্যগ্র হয়ে পান করে।

(পরিচারিকার প্রবেশ।)

পরি। রাজনন্দিনি, একজন পটোদের মেয়ে পট বেচবার জন্তে এসেছে; আপনি যদি আজ্ঞা করেন, তবে তাকে এখানে ডেকে আনি। সে বল্ছে যে তার কাছে অনেক রকম উত্তম উত্তম পট আছে।

সখী । দূর, একি পট দেখবার সময় ?
পদ্মা । কেন ? এখনও ত বড় অন্ধ-
কার হয় নাই । (পরিচারিকার প্রতি)
যা, তুই চিত্রকরীকে ডেকে আনগে ।

পরি । রাজনন্দিনি, সে অতি নিকটে
আছে । (উচ্চস্বরে) ওলো পটোদের
মেয়ে, আয়, তোকে রাজনন্দিনী ডাকছেন ।

নেপথ্যে । এই যাচি ।

(চিত্রকরীবশে রতিদেবীর প্রবেশ ।)

সখী । (জনান্তিকে পদ্মাবতীর প্রতি)
প্রিয়সখি, এর নীচকূলে জন্ম বটে, কিন্তু
রূপলাবণ্য দেখলে চক্ষু জুড়ায় ।

পদ্মা । (জনান্তিকে সখীর প্রতি)
তুমি কি ভেবেচ, সখি, যে মণি মানিক্য
কেবল রাজগৃহে থাকে ? কতশত অন্ধকার-
ময় খনিতেও যে তাদের পাওয়া যায় । এই
যে উজ্জ্বল মুক্তাটি দেখ্চ, এ একটা কদা-
কার শুক্রির গর্ভে জন্মেছিল । আর যে
নলিনীকে লোকে ফুলকূলের ঈশ্বরী বলে,
তার কাদায় জন্ম । (রতির প্রতি) তুমি কি
চাও ?

রতি । (স্বগত) আহা ! রাজা ইন্দ্র-
নীলের কি সৌভাগ্য । তা সে শচীর আর
মুরজার দর্প চূর্ণ করে আমার যে মান
রেখেছে, আমার তাকেই এই অমূল্য রত্নটি
দান করা উচিত ।

পদ্মা । চিত্রকরি, তুমি যে চূপ করে
রৈলে ? তুমি ভয় করো না । এখানে
কার সাধ্য যে, তোমার প্রতি কোন অত্যা-
চার করে ।

রতি । আপনি হচেন রাজার মেয়ে,
আপনার কাছে মুখখুলতে আমার ভয়
হয় ।

পদ্মা । (সহাস্রবদনে) কেন ? রাজ-
কন্যারা কি রাক্ষসী ? তারাও তোমাদের
মতন মানুষ বৈ ত নয় ।

রতি । (স্বগত) আহা ! মেয়েটি
যেমন সুন্দরী তেমনই সরলা ।

পদ্মা । (শিলাতলে উপবেশন করিয়া)
চিত্রকরি, এই আমি বসলেম, তোমার পট
সকল এক এক খান করে দেখাও ।

রতি । যে আজ্ঞে, এই দেখাচি ।

পদ্মা । চিত্রকরি, তুমি কোথায় থাক ?

রতি । আজ্ঞে, আমরা পাহাড়ে
মানুষ ।

পদ্মা । তোমার স্বামী আছে ?

রতি । রাজনন্দিনি, আমার পোড়া
স্বামীর কথা আর কেন জিজ্ঞাসা করেন ?
তিনি আগুনে পুড়েও মরেন না । আর
যেখানে সেখানে পান, কেবল লোকের
মন মজিয়ে বেড়ান ।

সখী । প্রিয়সখি, যদি তোমার পট দেখতে
ইচ্ছা থাকে, তবে আর দেরি করো না ।

পদ্মা । চিত্রকরি, এস, তোমার পট
দেখাও ।

রতি । এই দেখুন । (একখান পট
প্রদান ।)

পদ্মা । (অবলোকন করিয়া সখীর
প্রতি) সখি, এই দেখ, অশোককাননে
সীতাদেবী রাক্ষসীদের মধ্যে বসে কাঁদ-
চেন । আহা ! যেন সৌদামিনী মেঘমালায়
বেষ্টিতা হয়ে রয়েছে । কিন্না নলিনীকে
যেন শৈবালকুল ঘেরে বসেছে । আর ঐ
যে ক্ষুদ্র বানরটি গাছের ডালে দেখ্চ,
ও পবনপুত্র হনুমান । দেখ, জানকীর
দশা দেখে ওর চক্কের জল রুষ্টিধারার মতন
অনর্গল পড়ছে । সখি, এ সকল ত্রেতা-
যুগের কথা, তবু এখনও মনে হলো হৃদয়
বিদীর্ণ হয় ।

রতি । (স্বগত) আহা ! এ কি
সামান্য দয়ালীলা । ভগবতী হৃদয়
দুঃখেও এর নয়ন অক্ষয়লে পরিষ্কার হলো ।

(প্রকাশে) রাজনন্দিনি, আরও দেখুন।
(অন্য একখান পট প্রদান।)

পদ্মা। এ দ্রৌপদীর স্বয়ম্বর। এই যে ব্রাহ্মণ ধনুর্ক্ষাণ ধরে অলক্ষ্য লক্ষ্যের দিকে আকাশমার্গে দৃষ্টি কচেন, ইনি যথার্থ ব্রাহ্মণ নন। ইনি ছদ্মবেশী ধনঞ্জয়। ঐ যাজ্ঞসেনী।

রতি। (পদ্মাবতীর প্রতি) রাজনন্দিনি, এই পটখান একবার দেখুন দেখি। (পট প্রদান।)

পদ্মা। (অবলোকন করিয়া ব্যগ্রভাবে রতির প্রতি) চিত্রকরি, এ কার প্রতিমূর্তি লা?

রতি। আজ্ঞে, তা আমি আপনাকে —(অর্দ্ধোক্তি)।

পদ্মা। সখি——(মূর্ছাপ্রাপ্ত)।

সখী। (পদ্মাবতীকে ক্রোড়ে ধারণ করিয়া) হায়, একি! প্রিয়সখী যে হঠাৎ অজ্ঞান হয়ে পড়লেন। (পরিচারিকার প্রতি) ওলো মাধবি, তুই শীঘ্র একটু জল আনত লা।

[পরিচারিকার বেগে প্রস্থান।

রতি। (স্বগত) ইস্রনীলের প্রতি যে পদ্মাবতীর এত পূর্করাগ জন্মেছে, তা ত আমি জানতেম না। এদের দুজনকে স্বপ্রয়োগে কয়েকবার একত্র করাতেই এরা উভয়ে উভয়ের প্রতি এত অনুরক্ত হয়েছে। এত ভালই হয়েছে। আমার আর এখন এখানে থাকায় কোন প্রয়োজন নাই। শচী আর মুরজার ক্রোধে পদ্মাবতীর অনিষ্ট ঘটতে পারবে? আমি এ সকল রক্তান্ত ভগবতী পার্শ্বতীকে অবগত করালে, তিনি যে এই পদ্মাবতীর প্রতি অনুকূল হবেন তার কোন সন্দেহ নাই। (অস্ত্রস্থান।)

সখী। (স্বগত) হায়! প্রিয়সখী যে সহসা অচেতন হয়ে পড়লেন এর কারণ কি?

পদ্মা। (গাত্রোথান করিয়া ব্যগ্রভাবে) সখি, চিত্রকরী কোথায় গেল?

সখী। কৈ, তাকে ত দেখতে পাই না। বোধ করি সে তোমাকে অচেতন দেখে মাধবীর সঙ্গে জল আনতে গিয়ে থাকবে।

পদ্মা। (ব্যগ্রভাবে) তবে কি সে চিত্রপটপানা সঙ্গে লয়ে গেছে?

সখী। ঐ যে চিত্রপট তোমার সম্মুখেই পড়ে রয়েছে।

পদ্মা। (ব্যগ্রভাবে চিত্রপট লইয়া বক্ষঃস্থলে স্থাপন করিয়া) সখি, এ চিত্রকরীকে তুমি আর কখন দেখেচ?

সখী। প্রিয়সখি, তুমি যে চিত্রপটখানা এত যত্ন করে বুকে লুকিয়ে রাখলে?

পদ্মা। আমি যা জিজ্ঞাসা কচি তার উত্তর দাও না কেন? এ চিত্রকরীকে তুমি আর কখন দেখেচ?

সখী। ওকে আমি কোথায় দেখবো?
(জল লইয়া পরিচারিকার পুনঃ প্রবেশ।)

পরি। রাজনন্দিনী যে আমি জল না আনতে আনতে সেরে উঠেছেন, তা বেশ হয়েছে।

সখী। হ্যাঁ লা মাধবি, এ পটো মাগী কোন দিকে গেল তুই দেখেছিস?

পরি। কেন? সে না এখানেই ছিল। সে ত কই আমার সঙ্গে যায় নাই। যাই, এখন আমি এ ষটিটে রেখে আসিগে।

[প্রস্থান।

পদ্মা। (চতুর্দিক অবলোকন করিয়া) কি আশ্চর্য্য! সখি, আমি বোধ করি এ চিত্রকরী কোন সামান্য স্ত্রী না হবে।

সখী। (চতুর্দিক অবলোকন করিয়া) তাই ত, এ কি পাখী হয়ে উড়ে গেল?

পদ্মা। দেখ, সখি, তুমি কারো কাছে এ কথার প্রসঙ্গ করো না।

সখী । প্রিয়সখি, তুমি যদি বারণ কর তবে নাই বা কল্যেয় । (নেপথ্যে নানা-বিধ যন্ত্রধ্বনি) ঐ শোন । সঙ্গীতশালায় গানবাদ্য আরম্ভ হলো । চল, আমরা যাই ।

পদ্মা । সখি, তুমি যাও ; আমি আরও কিছুকাল এখানে থাকতে ইচ্ছা করি ।

সখী । প্রিয়সখি, তুমি না গেলে কি ওরা কেউ মন দিয়ে গাবে না বাজাবে ?

পদ্মা । আমি গেলেম্ বল্যে । তুমি গিয়ে নিপুণিকাকে আমার বীণার সুর বাধতে বল ।

সখী । আচ্ছা—তবে আমি চল্যেয় ।
[প্রস্থান ।

পদ্মা । হে রজনীদেবি, এ নিখিল জগতে কোন্ ব্যক্তি এমন দুঃখী আছে, যে সে তোমার কাছে তার মনের কথা না কয় ? দেখ, এই যে ধুতুরাফুল, এ সমস্ত দিন লজ্জায় আর মনস্তাপে মৌনভাবে থাকে, কেন না বিধাতা একে পরমসুন্দরী করেও এর অধরকে বিষাক্ত করেছেন, কিন্তু তুমি এলে এও লজ্জা সম্বরণ করে বিকশিত হয় । জননি, তুমি পরমদয়াশীলা । (পরিক্রমণ করিয়া) হায় ! আমার কি হলো । আজ্ কয়েক দিন অবধি আমি প্রতি রাতে যে একটা অদ্ভুত স্বপ্ন দেখি, তার কথা আর কাকে বলবো ? বোধ হয়, যেন একটা পরম সুন্দর পুরুষ আমার পাশে দাঁড়িয়ে এই বলেন—“কল্যাণি, আমার এই স্তম্ভসরোবরকে সুশোভিত করবার নিমিত্তেই বিধাতা তোমার মতন কনকপদ্ম সৃষ্টি করেছেন । প্রিয়ে, তুমি আমার ।” এই মাত্র বলে সেই মহাত্মা অন্তর্ধান হন । আর এই তাঁরই প্রতিমূর্তি । এই যে চিত্রকরী যিনি আমাকে অমূল্য রতন প্রদান করে গেলেন, ইনিই বা কে ?

(পটের প্রতি দৃষ্টি নিক্ষেপ ও নিশ্বাস পরিত্যাগ করিয়া) হে প্রাণেশ্বর, তুমি অন্ধকারময় রাতে যে গৃহস্থের মন চুরি করেছ, সে তোমাকে এই মিনতি কচ্যে যে তুমি নির্ভয় হয়ে তার আর যা কিছু অবশিষ্ট আছে, তাও এসে অপহরণ কর ।

নেপথ্যে । রাজনন্দিনী যে এখনও এলেন না ? তিনি না এলে ত আমরা গাইতে আরম্ভ করবো না ।

পদ্মা । (স্বগত) হায় ! আমার এমন দশা কেন ঘটলো ? হে স্বপ্নদেবি, এ যদি তোমারই লীলা হয়, তবে তুমি এ দাসীকে আর বুঝা যন্ত্রণা দিও না । (দীর্ঘনিশ্বাস পরিত্যাগ করিয়া) তা আমি এ সকল কথা কি জন্মে আর ভুলতে পারবো ?

(পরিচারিকার পুনঃ প্রবেশ ।)

পরি । রাজনন্দিনি, আপনি না এলে ওরা কেউ গাইতে চায় না । আর নিপুণিকাও আপনার বীণার সুর বেঁধেছে ।

পদ্মা । তবে চল ।

[উভয়ের প্রস্থান ।

(শচী এবং মুরজার প্রবেশ ।)

শচী । (সরোষে) সখি, রতিকে ত তুমি ভাল করে চেন না । ওর অসাধ্য কর্ম কি আছে ? দেখ, রুদ্রদেব রাগলে ভগবতী পার্বতীও তাঁর নিকটে যেতে ভয় পান, কিন্তু রতি অনায়াসে তাঁর কাছে গিয়ে কেঁদে কেঁদে চক্ষের জলে তাঁর কোপানল নির্বাণ করে । রতি কঁাদ পাতলে তাতে কে না পড়ে ? অমরকূলে এমন মেয়ে কি আর দুটি আছে ?

মুর । তা ও এখানে এসে কি করেছে ?

শচী । কি না করেছে ? এই মাহেশ্বরীপুরীর রাজা যজ্ঞসেনের মেয়ে পদ্মা-

বতীর মতন সুন্দরী নারী পৃথিবীতে নাই ।
রতি এই মেয়েটির সঙ্গে ছুঁই ইন্দ্রনীর
বিবাহ দেবার চেষ্টা পাচ্যে । সখি, ইন্দ্র-
নীলকে যদি রতি এই জীরত্বটী দান করে,
তবে আমাদের কি আর মান থাকবে ?

মুর । তার সন্দেহ কি ? তা ও কি
প্রকারে এ চেষ্টা পাচ্যে, তার কিছু
জেনেছ ?

শচী । শুনবো না কেন ? ও প্রতি-
রাত্রে এসে ইন্দ্রনীর বেশ ধরে পদ্মা-
বতীকে স্বপ্নযোগে আলিঙ্গন দেয়, সুতরাং
মেয়েটিও একেবারে ইন্দ্রনীর সঙ্গে যেন
উদ্ভাস্তা হয়ে উঠেছে ।

মুর । বাঃ, রতির কি বুদ্ধি ?

শচী । বুদ্ধি ? আর শোন না ।
আবার রাজলক্ষীর বেশ ধারণ কর্যে ও
গতরাতে রাজা যজ্ঞসেনকে স্বপ্নে বলেছে
যে যদি পদ্মাবতীর স্বপ্নস্বর অতি শীঘ্র মহা-
মমারোহে না হয় তবে সে শ্রীভ্রষ্ট হবে ।

মুর । কি আশ্চর্য্য ! স্বপ্নস্বর হলেই ত
ইন্দ্রনীল অবশ্যই আসবে । আর ইন্দ্র-
নীলকে দেখ্বামাত্রেই পদ্মাবতী তাকেই
বরণ করবে ।

শচী । তা হলে আমরা গেলেম !
পৃথিবীতে কি আর কেউ আমাদের মানবে
না পূজা করবে ? সখি, তোমাকে আর
কি বলবো । এ কথা মনে পড়লে রাগে
আমার চক্ষে জল আসে । আর দেখ,
রাজা যজ্ঞসেন মন্ত্রীদেব লয়ে আজ এই
স্বপ্নস্বরের বিষয়ে বিচার কচ্যে ।

মুর । তবে ত আর সময় নাই ।
তা এখন কি কর্তব্য ?—ও কি ও ?
(নেপথ্যে বহুবিধ যন্ত্রধ্বনি) আহা ! কি
মধুরধ্বনি । সখি, একবার কাণ দিয়ে
শোন । তোমার স্মরণাবতীতেও এমন
মধুরধ্বনি দুর্লভ ।

শচী । আঃ, তুমিও যেমন । ও সকল
কি আর এখন ভাল লাগে ।

নেপথ্যে । তুই, সই, আরস্ত করনা
কেন ?

নেপথ্যে । চুপ কর লো—চুপ কর ।
ঐ শোন রাজনন্দিনী আরস্ত কচ্যে ।
(বীণাধ্বনি ।)

নেপথ্যে । আহা ! রাজনন্দিনি, তুমি
কি ভগবতী বীণাপাণীর বীণাটা একেবারে
কেড়ে নেছ গা ?

নেপথ্যে । মর, এত গোল করিস
কেন ?

নেপথ্যে । (গীত ।)

(থাম্বাজ—মধ্যমান ।)

কেন হেরেছিলামু তারে ।

বিষম প্রেমের জ্বালা বুঝি ষটিল আমারে ॥
সহজে অবোধ মন, না জানে প্রেম কেমন,
সাধে হয়ে পরাধীন, নিশিদিন ভাবে পরে ।
কত করি ভুলিবারে, মন তাতো নাহি পারে,
যবে যে ভাবনা করে, সে জাগে অন্তরে ।
শরমে মরম ব্যথা, নারি প্রকাশিতে কোথা,
জড়ের স্বপন ব্যথা, মরমে মরি গুমরে ॥

মুর । শচীদেবি, আমরা কি নন্দন-
কাননে উল্লসী আর চারুনেত্রার মধুরস্বর
শুনে মোহিত হলেম ?

শচী । সখি, তুমিও কি এই প্রজ্বলিত
হতাশনে আততি দিতে প্রবৃত্ত হলে ? দেখ,
যদি রতির মনস্কামনা সুসিদ্ধ হয়, তবে এই
সুধারস ছুঁই ইন্দ্রনীলই দিবারাত্র পান
করবে । (দীর্ঘনিশ্বাস পরিত্যাগ করিয়া)
সখি যক্ষ্মণরি, আমার মতন হতভাগিনী
কি আর দুটি আছে ? লোকে আমাকে
বুখা ইন্দ্রাণী বলে । আমার পতি বজ্রধারা
কত শত উন্নত পর্বত শৃঙ্গকে চূর্ণ করে
উড়িয়ে দেন ; কতশত বিশাল তরুরাজকে

ভঙ্গ্য করে ফেলেন ; কিন্তু আমি দেখ
একজন অতি ক্ষুদ্র মানবকেও যৎকিঞ্চিৎ
দণ্ড দিতে পারলেম্ না। হায় ! আমার
বেঁচে আর সুখ কি !

মুর। তবে, সখি, তোমার কি এই
ইচ্ছা যে ইন্দ্রনীলকে শাস্তি দেবার জন্তে
সুশীলা মেয়েটিকেও কষ্ট দেবে ?

শচী। কেন দেব না ? পরমান
চণ্ডালকে দেওয়া অপেক্ষা জলে ফেলে
দেওয়াও ভাল। দেখ, দুষ্টদমনের নিমিত্তে
বিধাতা সময় বিশেষে ভগবতী পৃথিবীকেও
জলমগ্না করেন।

মুর। তবে, সখি, চল, আমরা কলি-
দেবের কাছে যাই, তিনি এ বিষয়ের একটা
না একটা উপায় অবশ্যই করে দিতে
পারবেন।

শচী। (চিন্তা করিয়া) হ্যাঁ, এ যথার্থ
কথা। কলিদেবই এ বিষয়ে আমাদের
সাহায্য কতো পারবেন। তা সখি,
চল, আমরা শীঘ্র তাঁরই কাছে যাই।

[উভয়ের প্রস্থান।]

দ্বিতীয় গর্ভাঙ্ক ।

মাহেশ্বরীপুরী—রাজনিকেতন।

(কঙ্কুর প্রবেশ।)

কঙ্কু। (স্বগত) আহা ! শৈলেন্দ্রের
গলে শোভে যে রতন—

সে অমূল্য ধন কত সহজে কি তিনি
প্রদান করেন পরে ? গজরাজ শিরে
ফলে যে মুকুতারাজি, কে লভয়ে কবে
সে মুকুতারাজি, যদি না বিদরে আগে
সে শির ? সকলে জানে, সুরাসুর মিলি
মথিলা কত যতনে সাগর, লভিলা
অমৃত—কত পীড়নে পীড়ি জলনিধি !

হায় রে, কে পারে পরে দিতে ইচ্ছাকরি,
যে মণিতে গৃহ তার উজ্জল সতত।

(চিন্তা করিয়া)

বিধির এ বিধি কিন্তু কে পারে লঙ্ঘিতে ?—

ছায়ায় কি ফল কবে দরশে তরুর ?

সরোবরে ফুটিলে কমল, লোকে তারে

তুলে লয়ে যায় সুখে ! মলয়-মারুত,

কুসুম কানন ধন সুরভিরে হরি,

দেশ দেশান্তরে চলি যান কুতূহলে !

হিমাদ্রির কণক ভবন ত্যজি সতী—

ভবভাবিনী ভবানী—ভঞ্জন ভবেশে !

(পরিক্রমণ)

যার ঘরে জনমে দুহিতা, এ যাতনা

ভোগী সে ! (দীর্ঘনিশ্বাস)—

প্রভো, তোমারই ইচ্ছা। যা হোক, মহা-

রাজ যে এখন রাজনন্দিনী পদ্মাবতীর স্বয়-

স্বরে সম্মত হয়েছেন, এ পরম আঙ্কাদের

বিষয়। এখন জগদীশ্বর এই করুন যে

কণ্ঠাটী যেন একটি উপযুক্ত পাত্রের হাতেই

পড়ে।

(নেপথ্যাভিমুখে অবলোকন করিয়া
প্রকাশে) কে ও ?

(সখীর প্রবেশ)

বসুমতী না ? আরে এস, দিদি এস !

আমি বুদ্ধব্রাহ্মণ—কালক্রমে প্রায়ই অন্ধ

হয়েছি, কিন্তু তবু ও পূর্ণশশীর উদয় হলো

তাঁকে চিন্তে পারি। এস এস।

সখী। ঠাকুর দাদা, প্রণাম করি।

কঙ্কু। কল্যাণ হউক।

সখী। মহাশয়, আমার প্রিয়সখীর

নাকি স্বয়ম্বর হবে ?

কঙ্কু। এ কথা তোমাকে কে বলো ?

সখী। যে বলুক না কেন ? বলি এ

সত্য ত ?

কঙ্কু। বাঃ, কেমন করে সত্য হবে ?

তোমার প্রিয়সখী ত আর পাঞ্চালী ননু যে

তার পক্ষস্বামী হবে। আমি বেঁচে থাকতে
তার কি আর বিবাহ হতে পারে? গৌরী
কি হরকে বন্ধ বন্যে ত্যাগ কতে পারেন?
(হাস্ত)।

সখী। (স্বগত) দূর বুড়ো। (হস্তধারণ
করিয়। প্রকাশে) ঠাকুরদাদা, আপনার
পায়ে পড়ি, বলুন না, এ কথাটা কি সত্য?

কঞ্চু। আরে কর কি? গায়ে হাত
দিও না। তুমি কি জান না, নীরস তরুকে
দাবানল স্পর্শ করলে, সে যে তৎক্ষণাৎ
জলে যায়।

সখী। তবে আমি চল্লেম।

কঞ্চু। কেন?

সখী। এখানে থেকে আবশ্যিক কি?
আপনার কাছে ত কোন কথাটিই পাওয়া
যায় না।

কঞ্চু। (সহাস্তবদনে) আরে, আমি
রাজসংসারে চাকুরী করে বুড়ো হয়েছি।
আমাকে ঘুম না দিলে কি আমার দ্বারা
কোন কর্ম হতে পারে? স্থানিগাছে তেল
না দিলে সে কি সহজে ঘোরে?

সখী। আচ্ছা। রাজমাতার সোণার
হামান্দিস্তায় যে পান মসলা দিয়ে হেঁচে,
তাই আপনাকে না হয় একটু এনে দেব।
তা হলে ত হবে?

কঞ্চু। শুধু পান নিয়ে কি হবে?
মিঠাই টিঠাই কিছু দিতে পার কি না?

সখী। হাঁ! পারবো না কেন?

কঞ্চু। তবে বলি। এ কথা যথার্থ।
তোমার প্রিয়সখীর স্বয়ম্বর হবে।

সখী। (ব্যগ্রভাবে) হ্যাঁ! মহাশয়, কবে
হবে?

কঞ্চু। অতি নীঘ্রই হবে। মহারাজ
মন্ত্রীবরকে স্বয়ম্বরের সমুদয় আয়োজন
কতে অনুমতি করেছেন। আর কাল
প্রাতে দূতেরা নিমন্ত্রণপত্র নিয়ে দেশ দেশা-

ন্তরে যাত্রা করবে। দেখো, এ পদ্মের
গন্ধে আলিকুল একবারে উন্মত্ত হয়ে উড়ে
আসবে। ও কি ও! তুমি কাঁদতে আরম্ভ
কলো। তোমাকে ত আর স্বস্তরবাড়ী যেতে
হবে না।

সখী। (চক্ষু মুছিয়া) কৈ। আমি
কাঁদছি আপনাকে কে বললে? (রোদন)।

কঞ্চু। আরে ঐ যে। কি উৎপাত!
তা তোমার জন্তেও না হয় একটা বর ধরে
দেব, তার নিমিত্তে ভাবনা কি? তোমার
প্রিয়সখী ত আর সকলকে বরণ করবেন
না। আর যদি তুমি রাজকূলে বিয়ে কতে
না চাও—তবে শর্মা ত রয়েছেন।

সখী। আঃ; যাও, মিছে ঠাটা করো
না। (রোদন)।

(পরিচারিকার প্রবেশ)।

পরি। কঞ্চুকী মহাশয়, প্রণাম করি।

কঞ্চু। এস, কল্যাণ হউক। (স্বগত)
এ গস্তানী আবার কোথ থেকে এসে উপ-
স্থিত হলো? কি আপদ! এ যে গঙ্গায়
আবার যমুনা এসে পড়লেন। এখন ত
আর জলের অভাব থাকবে না।

সখী। মাধবি, প্রিয়সখী যথার্থই এত-
দিনের পর আমাদের ছেড়ে চললেন।
(রোদন)।

পরি। (ব্যগ্রভাবে) কেন, কেন?
কি হয়েছে?

সখী। আমরা যে স্বয়ম্বরের কথা
শুনেছিলাম, সে সকলই সত্য হলো।
(রোদন)।

কঞ্চু। (স্বগত) আহা! প্রণবপদ্মের
মৃণালে যে কণ্টক জন্মে, সে কি সামান্য
তীক্ষ্ণ? আর তার বেঁধনে যে প্রাণ কি
পর্যন্ত ব্যথিত হয়, তা সে বেদনা যে সহ
করেছে, সেই কেবল বন্ডে পারে।
(প্রকাশে) আরে তোরা যে কেঁদেই অস্থির

হলি ! এমন কথা শুনে কি কাঁদতে হয় ?
রাজনন্দিনী কি চিরকাল আইবড় থাকলে
তোরা সুখী হবি ?

পরি। বালাই ! তাঁর শত্রু আইবড়
থাকুক, তিনি থাকবেন কেন ?

কঞ্চু। তবে তোরা কাঁদিস্ কেন লা ?

পরি। তুমিও যেমন। কে কাঁদচে ?
তুমি কাণা হলে নাকি ?

কঞ্চু। তবে তুই, ভাই, একবার
হাস্ ত, দেখি।

পরি। হাসবো না কেন ? এই দেখ।
(হাস্য ও রোদন)।

কঞ্চু। বেশ ! ওলো মাধবি, লোকে
বলে রোদে রুষ্টি হলে খেঁকশেয়ালীর বিয়ে
হয়, তা আমি দেখ্ চি তোরও বিয়ে অতি
নিকট।

পরি। কেন ? আমি কি খেঁকশিয়ালী !
ঘাও, মিছে গাল্ দিও না।

সখী। ওলো মাধবি, চল্ আমরা যাই।

পরি। চল।

[উভয়ের ক্রন্দন করিতে করিতে প্রস্থান।

কঞ্চু। (স্বগত) আমাদের পদ্মাবতীর
রূপ লাভ্য দেখ্লে কোন মতেই বিশ্বাস
হয় না যে এর মানবকূলে জন্ম। সৌন্দ-
মিনী কি কখন ভূতলে উৎপন্ন হয় ? আর
এ যে কেবল সৌন্দর্য্য গুণে চক্ষের সুখ-
করী মাত্র, তা নয়,—এমন দয়ালী পরো-
পকারিণী কামিনী কি আর আছে ? আর
তা না হবেই বা কেন ? পারিজাত পুষ্প
কি কখন সৌরভহীন হতে পারে ? আহা !
এ মহার্হ রত্ন কোন রাজগৃহ উজ্জ্বল করবে
হে ?

নেপথ্যে বৈতালিক।

গীত।

পরজ কাণ্ডা—একতালা।

অপরূপ আভিকার রাজসভা শোভিল।
জিনি অমরাপুরী নৃপপুর হইতেছে ;

বিভবে সুরেন্দ্র লাজ পাইল ॥

মোহনমুরতি অতি রাজন রাজিছে,
রতিপতি ভাতি হেরি মোহিল।

তুলনা দিবার তরে, রজনী সে আপনি
শশীরে সাজায় ধনী আনিল।

কঞ্চু। (স্বগত) এই ত মহারাজ সভা
হতে গাত্রোথান কল্যে। এখন যাই,
আপনার কৰ্ম দেখিগে। [প্রস্থান।

ইতি দ্বিতীয়াক্ষ।

তৃতীয়াক্ষ।

প্রথম গর্ভাক্ষ।

মাহেশ্বরীপুরী—রাজনিকেতনসন্নিধানে
মদনোদ্যান।

(ছদ্মবেশে রাজা ইন্দ্রনীল এবং বিদূষকের প্রবেশ।)

রাজা। সখে মানবক্।

বিদূ। মহারাজ—

রাজা। আরে—ও আবার কি ? আমি
এক জন বণিক ; তুমি আমার মিত্র ;
আমরা দুজনে এই মাহেশ্বরী পুরীর রাজ-
কণ্ঠা পদ্মাবতীর স্বয়ম্বরসমারোহ দেখবার
জন্তেই এ রাজ্যে এসেছি—

বিদূ। আজে—আর বলতে হবে না।

রাজা। তবে তুমি এই শিলাতলে
বসো, আমি ঐ দেবালয়ের নিকটে সরোবর
থেকে একটু জলপান করো আসি। আঃ
এই নগর ভ্রমণ করে আমি যে কি পর্য্যন্ত
ক্লান্ত হয়েছি, তার আর কি বলবো।

বিদূ। তবে আপনি কেন এখানে
বসুন না, আমিই আপনাকে জল এনে
দিচ্ছি। ব্রাহ্মণের জল খেলে ত আর
বেণের জাৎ যায় না।

রাজা। (সহাস্যবদনে) সখে, তা ত যায় না বটে, কিন্তু জল আনবে কিসে করে? এখানে পাত্র কোথায়? তুমি ত আর পবনপুত্র হনুমান নও, যে ঔষধ না পেয়ে একবারে গন্ধমাদনকে উপড়ে এনে ফেলবে! তা তুমি থাক, আমি আপনিই যাই। [প্রস্থান।

বিদু। (স্বগত) হায়! আমার কি ছুরদৃষ্ট! দেখ, এই মাহেশ্বরী পুরীর রাজার মেয়ের স্বয়ম্বর হবে বল্যে, প্রায় একলক্ষ রাজা এখানে এসে উপস্থিত হয়েছে; আর এই নগরের চারিদিকে যে কত তাম্বু আর কানাত পড়েছে, তার সংখ্যা নাই। কত হাঙ্গী, কত শোড়া, কত উঠ, কত রথ, আর যে কত লোকজন এসে একত্র হয়েছে, তা কে গুণে ঠিক কত্যা পারে? আর কত শত স্থানে যে নট নটীরা নৃত্যগীত কচে, তা বলা ছুঁকর। আর যেমন বর্ষাকালে জল পর্ষিত থেকে শত শ্রোতে বেরিয়ে যায়, রাজসভার থেকে সিদে পত্র তেমনিই বেরুচে। আহা! কত যে চাল, কত যে ভাল, কত যে তেল, কত যে লবণ, কত যে ঘি, কত যে সন্দেশ, কত যে দই, কত যে ছুধ, ভারে ভারে আস্চে যাচে, তা দেখলে একবারে চক্ষুস্থির হয়। রাজা-বেটার কি অতুল ঐশ্বর্য! (দীর্ঘনিশ্বাস পরিত্যাগ করিয়া) তা দেখ, এ হতভাগা বামণের কপালে এর কিছুই নাই। আমাদের মহারাজ কল্যেন কি, না সঙ্গে যত লোকজন এসেছিল তাদের সকলকে দূরে রেখে কেবল আমাকে লয়ে ছদ্মবেশে এ নগরে এসে ঢুকেছেন। এতে যে ওরে কি লাভ হবে তা উনিই জানেন। তবে লাভের মধ্যে আমি দরিদ্র ব্রাহ্মণ আমার দক্ষিণাটি দেখি চি লোপাপত্তি হবে। হায়! একি সামান্ত দুঃখের কথা? (চিন্তা করিয়া)

মহারাজ, একটা মেয়ে মানুষকে স্বপ্নে দেখে এই প্রতিজ্ঞা করে বসেছেন, যে তাকে না পেলে আর কাকেও বিয়ে করবেন না। হ'য়! দেখ দেখি, এ কত বড় পাগলামি। আর—আমি যে রাতে স্বপ্নে নানা রকম উপাদেয় মিষ্টান্ন খাই তা বল্যে কি আমার ব্রাহ্মণী যখন খোড় হেঁচকি, কি কাঁচকলা ভাতে, কি বেগুণ পোড়া, এনে দেয়, তখন কি সে সব আমি না খেয়ে পাতে ত্রৈলে রেখে দি? সাগর সকল জলই গ্রহণ করেন। আমিদেরকে যা দাও তাই তিনি চক্ষুর নিমিষে পরিপাক করে ভক্ষ্য করে ফেলেন।

(রাজার পুনঃ প্রবেশ)।

রাজা। কি হে সখে মানসক, তুমি যে একবারে চিন্তা সাগরে মগ্ন হয়ে রয়েছে?

বিদু। মহারাজ—

রাজা। মরু বানর। আবার?

বিদু। আজ্ঞা—না। তা আপনার এত বিলম্ব হলো কেন?

রাজা। 'সখে, আমি এক অদ্ভুত স্বয়ম্বর দেখতে ছিলাম।

বিদু। বলেন কি? কোথায়?

রাজা। সখে; ঐ সরোবরে কমলিনী আজ যেন স্বয়ম্বর হয়েছে। আর তার পানিগ্রহণ লোভে ভগবান সহস্ররশ্মি, মলয়মারুত, অলিরাঙ্গ, আর রাজহংস—এঁরা সকলেই এসে উপস্থিত হয়েছেন। আর কত যে কোকিলকুল মঙ্গলধ্বনি কচে তা আর কি বলবো? এসো সখে, আমরা ঐ সরোবরকূলে যাই?

বিদু। ভাল—মহাশয়, আপনি যে আমাকে নিমন্ত্রণ কচেন, তা বলুন দেখি, আমার দক্ষিণা কে দেবে?

রাজা। কেন? কমলিনী আপনিই দেবে। তার সুরভি মধু দিয়ে সে যে তোমার চিত্তবিনোদ করবে, তার কোন সন্দেহ নাই।

বিদূ। হা! হা! হা! (উচ্চহাস) মহাশয়, আমি ব্রাহ্মণ, আমার কাছে কি ওসব ভাল লাগে? হয় টাকাকড়ি—নয় খাদ্যদ্রব্য—এই দুটোর একটা না একটা হলো কি আমি উঠি।

রাজা। চল হে, চল, না হয় আমিই দেব।

বিদূ। হা—এ শোনবার কথা বটে। তবে চলুন।

[উভয়ের প্রস্থান।

(সখী এবং পরিচারিকার প্রবেশ।)

সখী। মাধবি, আমি ত আর চলতে পারি না। উঃ, আমার জন্মেও আমি কখন এত হাঁটি নাই। আমার সর্বাঙ্গে যে কত বেদনা হয়েছে, তার আর বলবো কি? বোধ করি আমাকে এখন চারি পাঁচ দিন বুকি কেবল বিছানাতেই পড়ে থাকতে হবে।

পরি। ও মা! সে কি? রাজনন্দিনীর স্বয়ম্বরের আর দুটিদিন বই ত নাই! তা তুমি পড়ে থাকলে কি আর কর্ম চলবে?

সখী। না চললে আমি কি করবো? আমার ত আর পাষাণের শরীর নয়।

পরি। সে কিছু মিছে কথা নয়।

সখী। (পট অবলোকন করিয়া দেখ, আমি প্রিয়সখীকে না হবে ত প্রায় সহস্রবার বলেছি যে এ প্রতিমূর্ত্তি কখনই মনুষ্যের নয়, কিন্তু আমার কথায় তিনি কোন মতেই বিশ্বাস করেন না।

পরি। কি আশ্চর্য্য! এই যে আমরা আজ সমস্ত দিন বেড়িয়ে বেড়িয়ে প্রায়

একলক্ষ রাজা দেখে এলেম, এদের মধ্যে এমন একটি পুরুষ নাই, যে তাঁকে এর সঙ্গে এক মুহূর্ত্তের জন্তেও তুলনা করা যায়। হায়, এ মহাপুরুষ কোথায়?

সখী। সুমেরুপর্ব্বত যে কোথায় তা কে বলতে পারে? কনকলক্ষা কি লোকে আর এখন দেখতে পায়?

পরি। তা সত্যবটে। তবে এখন কি করবে?

সখী। আর কি করবো! আয়, এই উদ্যানে একটুখানি বিশ্রাম করে প্রিয়সখীর কাছে এ সকল কথা বলিগে। (শিলাতলে উপবেশন)।

পরি। আহা! রাজনন্দিনীকে এ কথা কেমন করে বলবে? একথা শুনলে তিনি যে কত দুঃখিত হবেন, তা মনে পড়লে আমার চখে জল আসে।

সখী। তা এ মায়ার হেমমুগ ধরা তোর আমার কর্ম নয়। এ যে একবার দেখা দিয়ে কোন গহন কাননে গিয়ে পালিয়ে রইলো, তা কে বলতে পারে? জগদীশ্বর এই করুন, যেন প্রিয়সখী এর প্রতি শোভ করো অবশেষে সীতাসেবীর মতন কোন ক্রেশে না পড়েন। এ যে দেবমায়ী তার কোন সন্দেহ নাই। (পরিচারিকার প্রতি) তুই যে বসছিস না? তোর কি এত হেঁটেও কিছু পরিশ্রম হয় নাই?

পরি। হয়েছে বই কি! কিন্তু রাজনন্দিনীর দুঃখের কথা ভাবলে আর কোন দুঃখই মনে পড়ে ন্দ। যে গায়ের সাপের বিষ প্রবেশ করেছে, সে কি আর বিছের কামড়ে জলে। (সখীর নিকটে ভূতলে উপবেশন) এখন এ স্বয়ম্বরটা হয়ে গেলেই বাঁচি।

সখী। তুই দেখিস, এ স্বয়ম্বরে কোন

না কোন ব্যাঘাত অবশ্যই ঘটে
উঠবে।

পরি। বালাই। এমন অমঙ্গল কথা
কি মুখে আনতে আছে ?

সখী। তুই প্রিয়সখীর প্রতিজ্ঞা ভুলে
গেলি না কি ? তোর কি মনে নাই যে
যদি এ লক্ষ রাজার মধ্যে তিনি যে মহা-
পুরুষকে স্বপ্নে দেখেছেন, সেই তাঁর
প্রাণেশ্বরকে না পান, তবে তিনি আর
কাকেও বরণ করবেন না ?

নেপথ্যে। (উচ্চহাস্য)।

সখী। (নেপথ্যাভিমুখে অবলোকন
করিয়া সচকিতে) ও আবার কি ?

পরি। কেন, কি হলো ? (উভয়ের
গাত্রোখান)।

পরি। (সত্রাসে) ওমা ! চল
আমরা এখান থেকে পালাই। এ মহা-
স্বয়ম্বরে যে কত দেব, দানব, যক্ষ, রক্ষঃ,
এসে উপস্থিত হয়েছে, তা কে বলতে
পারে ? এ নিৰ্জন বনে—

সখী। চুপ করলো ! চুপ কর। আর
ঐ দেখ্—

পরি। (নেপথ্যাভিমুখে অবলোকন
করিয়া) কি আশ্চর্য্য ! ঐ না পুরুষটির
ধারে তুই জন পুরুষমানুষ বসে রয়েছে ?
আহা ! ওদের মধ্যে এক জনের কি অপ-
রূপ রূপলাবণ্য !

সখী। (পট অবলোকন করিয়া)
মাধবি, এত ক্ষণের পর বোধ করি, আমা-
দের পরিশ্রম সফল হলো। ঐ সুন্দর
পুরুষটির দিকে একবার বেষণ করে চেয়ে
দেখ্ দেখি।

পরি। তাই ত ! কি আশ্চর্য্য ! এ
কি গগনের চাঁদ ভূতলে এসে উপস্থিত
হলেন ?

সখী। (সপুলকে) এত গগনের

চন্দ্র নয়, এ যে আমার প্রিয়সখীর হৃদয়া-
কাশের পূর্ণচন্দ্র।

পরি। (পট অবলোকন করিয়া)
তাই ত ? এ কি আশ্চর্য্য ! তা ঔকে যে
রাজবেশে দেখ্চি না।

সখী। তাতে বয়ে গেল কি ?
(চিন্তা করিয়া) মাধবি, তুই এক কর্ণ
কর। তুই অন্তঃপুরে দৌড়ে গিয়ে, প্রিয়-
সখীকে একবার এখানে ডেকে আনগে
যদিও ঐ মহাপুরুষ মনুষ্য না হন, তবু
প্রিয়সখী ঔকে একবার চক্ষে দর্শন করো
জন্ম সফল করুন।

পরি। রাজনন্দিনী কি এখন অন্তঃপুর
হতে একলা আসতে পারবেন ?

সখী। তুই একবার যেনে দেখেই
আয় না কেন। যদি আসতে পারেন
ভালই ত, আর না পারেন আমরা ত দোষ
হতে মুক্ত হলাম।

পরি। বলেছ ভাল—এই আমি
চল্যোম।

[প্রস্থান।

সখী। (নেপথ্যাভিমুখে অবলোকন
করিয়া (স্বপ্নত) ইনি কি মনুষ্য না কোন
দেবতা, মায়াবলে মানবদেহ ধারণ করে এই
স্বয়ম্বর দেখতে এসেছেন ? হায়, একথা
আমি কাকে জিজ্ঞাসা করবো ? এখন
প্রিয়সখী এলে বাঁচি। আহা ! বিধাতা কি
এমন সুন্দর বর প্রিয়সখীর কপালে
লিখেছেন ?

(পদ্মাবতীর সহিত পরিচারিকার পুনঃ প্রবেশ।)

পদ্মা। সখি, তুমি আমাকে ডেকে
পাঠিয়েছ কেন ? কি সংবাদ, বল দেখি
শুনি ?

সখী। সকলই সুসংবাদ। তা এসো
এই শিলাতলে বসো।

পদ্মা । সখি, আমার আশ্রয় কি তোমাকে দর্শন দিয়েছেন ? (উপবেশন) ।

সখী । (পদ্মাবতীর নিকটে উপবেশন করিয়া) হ্যা—দিয়েছেন ।

পদ্মা । (ব্যগ্রভাবে সখীর হস্তধারণ করিয়া) সখি, তুমি তাঁকে কোথায় দেখেছ ?

সখী । (সহাস্রবদনে) প্রিয়সখি, তুমি স্থির হয়ে ঐ অশোকবনের দিকে একবার চেয়ে দেখ দেখি ।

পদ্মা । কেন ? তাতে কি ফললাভ হবে ?

সখী । বলি দেখই না কেন ?

পদ্মা । (নেপথ্যাভিমুখে অবলোকন করিয়া) ঐ ত ভগবান্ অশোকবৃক্ষ বসন্তের আগমনে যেন আপনার শতহস্তে পুষ্পাজলি ধারণ করে, ঋতুরাজের পূজা করবার অপেক্ষায় দাঁড়িয়ে রয়েছেন ।

সখী । ভাল, বল দেখি, ঋতুরাজ বসন্ত কোথায় ?

পদ্মা । সখি, একি পরিহাসের সময় !

সখী । পরিহাস কেন ? ঐ বেদিকার দিকে একবার চেয়ে দেখ দেখি ?

পদ্মা । (নেপথ্যাভিমুখে অবলোকন করিয়া) সখি, আমি কি আবার নিদ্রায় আবৃত হয়ে স্বপ্ন দেখতে লাগলেম ? (আশ্চর্য) হে হৃদয়, এত দিনের পর কি তোমার নিশাবসান কতে তোমার দিনকর উদয়াচলে দর্শন দিলেন । (প্রকাশ) সখি ! তুমি আমাকে ধর—(অচেতন হইয়া সখীর ক্রোড়ে পতন) ।

সখী । হায় ! এ কি হলো ? প্রিয়-সখী যে সহসা অচেতন হয়ে পড়লেন । (পরিচারিকার প্রতি) মাধবি, তুই দ্রুত গিয়ে একটু জল আন ।

পরি । এই যাই । [বেগে প্রস্থান ।

সখী । (স্বগত) হায় ! আমি প্রিয়-সখীকে এ সময়ে এ উদ্যানে ডাকিয়ে এনে এ কি কল্যে ?

(বেগে রাজার পুনঃপ্রবেশ) ।

রাজা । এ কি ? হুজুরি ! এ স্ত্রীলোক-টির কি হয়েছে ?

সখী । মহাশয়, এ'র মূর্ছা হয়েছে ।

রাজা । কেন ?

সখী । তা আমি এখন আপনাকে বলতে পারি না ।

রাজা । (স্বগত) লোকে বলে যে পূর্ণশশী উদয় হলে সাগর উখলিত হন, তা আমারও কি সেই দশা ঘটলো ! (পুন-রবলোকন করিয়া) একি ? এই যে আমার মনোমোহিনী যাকে আমি সপ্নযোগে কয়েক-বার দর্শন করেছিলেম । তা দেবতার। কি এত দিনের পর আমার প্রতি সুপ্রসন্ন হয়ে আমার হৃদয়নিধি মিলিয়ে দিলেন ।

পদ্মা । (চেতন পাইয়া দীর্ঘনিশ্বাস পরিত্যাগ) ।

রাজা । (সখীর প্রতি) শুভে, যেমন নিশাবসানে সরসীতে নলিনী উন্মীলিতা হয়, দেখ তোমার সখীও মোহান্তে আপন কমলাক্ষি উন্মীলন কল্যে । আহা ! ভগ-বতী জাহ্নবী দেবী, ভগ্নতটপতনে কিকিৎ-কালের নিমিত্তে কলুষা হয়ে, এইরূপেই আপন নিশ্চল স্ত্রী পুনর্ধারণ করেন ।

পদ্মা । (গাত্রোখান করিয়া যুগ্মধরে সখীর প্রতি) সখি, চল, আমরা এখন অন্তঃপুরে যাই । এ উদ্যানে আমাদের আর থাকা উচিত হয় না ।

রাজা । (স্বগত) আহা ! এও সেই মধুর স্বর । আমার বিবেচনায় তুমাতুর ব্যক্তির কণে জলপ্রোতের কলকল শ্রবণে এমন মিষ্ট বোধ হয় না । (প্রকাশে সখীর

প্রতি) সুন্দরি, তোমার প্রিয়সখী কি আমার এখানে আসাতে বিরক্ত হলেন ।

সখী । কেন ? বিরক্ত হবেন কেন ?

রাজা । তবে যে উনি এখান থেকে এত ত্বরায় যেতে চান ।

সখী ! আপনি এমন কথা কখনই মনে করবেন না । তবে কি না আমরা এখন সকলেই ব্যস্ত ।

রাজা । শুভে, তবে তুমি তোমার এ পরমসুন্দরী সখীর পরিচয় দিয়া আমাকে চরিতার্থ করে যাও ।

সখী । মহাশয়, ইনি রাজনন্দিনী পদ্মাবতীর একজন সখীমাত্র ।

রাজা । কি আশ্চর্য্য ! আমরা জানি যে বিধাতা কমলিনীকেই পুষ্পকুলের ঈশ্বরী করে সৃষ্টি করেছেন । তা তার অপেক্ষা কি আরও সুচারু পুষ্প পৃথিবীতে আছে ?

পদ্মা । (স্বগত) আহা ! প্রাণনাথ কি মিষ্টভাষী ! তা ভগবান গন্ধমাদন কি কখন সৌরভহীন হতে পারেন ?

সখী । মহাশয় ! আপনি যদি এ দাসীর অপরাধ মার্জনা করেন, তবে আমি আপনাকে একটি কথা জিজ্ঞাসা করি ?

রাজা । তাহে দোষ কি ? যদি আমি কোন প্রকারে তোমাদের মনোরঞ্জন কতে পারি, তবে তা অপেক্ষা আমার আর সৌভাগ্য কি ?

সখী । মহাশয়, কোন রাজধানী এখন আপনার বিরহে কাতরা হয়েছে, এ কথা আপনি অসুগ্রহ করে আমাদের বলুন ?

পদ্মা । (স্বগত) এতক্ষণের পর বসুমতী আমার মনের কথাটিই জিজ্ঞাসা করেছে ?

রাজা । (সহাস্ত বদনে) সুন্দরি, আমার বিদূর্ভনাগী মহানগরীতে জন্ম । সে নগরের রাজা ইন্দ্রনীলের সঙ্গে আমি

তোমাদের রাজনন্দিনীর শয়শ্বরমহোৎসব দেখবার নিমিত্তেই এ দেশে এসেছি ।

পদ্মা । (স্বগত) এ কি অসম্ভব কথা !

এর কি তবে রাজকূলে জন্ম নয় ?

(জল লইয়া পরিচারিকার পুনঃপ্রবেশ) ।

সখী । তোমার এত বিলম্ব হলো কেন ? পরি । আমাকে ঘটীর জন্তে অন্তঃপুর পর্য্যন্ত দৌড়ে যেতে হয়েছিল ।

সখী । তা সত্য বটে । তা এ কথা ত অন্তঃপুরে কেউ টের পায় নাই ?

পরি । না, এ কথা কেউ টের পায় নাই, কিন্তু ওরা সকলে মদনের পূজা কতে আসচে ।

সখী । তবে চল, আমরা যাই ।

রাজা । (সখীর প্রতি) সুন্দরি, আমি কি তবে তোমাদের চন্দ্রাননের আর এ জন্মে দর্শন পাব না ?

পদ্মা । (সখীর প্রতি লক্ষ্য করিয়া ব্রীড়া সহকারে) প্রিয়সখি, তুমি এ মহাশয়কে বল যে যদি আমাদের ভাগ্যে থাকে, তবে আমরা এই উদ্যানেই পুনরায় ওঁর দর্শন পাব ।

নেপথ্যে । কে লো কে ? রাজনন্দিনী আর বসুমতী কোথায় ?

সখী । চল, আমরা যাই ।

পদ্মা । (কিঞ্চিৎ পরিক্রমণ করিয়া) উহ । এ কি—

সখী । কেন ? কেন ? কি হলো ?

পদ্মা । সখি, দেখ, এই নূতন তৃণাঙ্গুর আমার পায়ে বাজতে লাগলো । উহ, আমি ত আর চলতে পারি না, তোমর একজন আমাকে ধর । (রাজার প্রতি লজ্জা এবং অনুরাগ সহকারে দৃষ্টিপাত) ।

সখী । এসো ।

[পদ্মাবতীকে ধারণ করিয়া সখী এবং পরিচারিকার প্রস্থান ।

রাজা । (স্বগত) হে সৌদামিনি,
তুমি কি আমার এ মেঘাবৃত হৃদয়াকাশকে
আরও তিমিরময় করবার জন্তে আমাকে
কেবল এক মুহূর্তের দর্শন দিলে ? (দীর্ঘ
নিশ্বাস পরিত্যাগ করিয়া) হায় ! তা এ
ষোর অন্ধকার তোমার পুনর্দর্শন ব্যতীত
কি আর কিছুতে কখন বিনষ্ট হবে ?

নেপথ্যে । (বহুবিধ যন্ত্রধ্বনি ।)

রাজা । (নেপথ্যাভিমুখে দৃষ্টিপাত
করিয়া স্বগত) এই যে রাজকুলবালারা
গাবনাদ্য কত্বে কত্বে ভগবান্ কন্দর্পের
মন্দিরের দিকে যাচে ।

নেপথ্যে । নাচলো, নাচলো এই
দেখ আমি কুল ছড়াচি ।

নেপথ্যে । গীত ।

। রাগিণী খাম্বাজ, তাল যঃ ।

চল সকলে আরাধিব কুসুমবাণে ।
স্বনে করতালি দেহ মিলিয়ে,
যতনে পূজিব হরিষ মনে ॥
বাছিয়া তুলিয়াছি নানা কুসুম,
অঞ্জলি পুরিয়া দিব চরণে ।
সখীর পরিণয়ে স্তম্ভ সাধিতে,
তুমি দেবের মঙ্গলগানে ॥

রাজা । (স্বগত) আহা, কি মধুর-
ধ্বনি । [তা আমার আর এস্থলে বিনষ্ট
করা উচিত হয় না । আমি এ নগরে ছদ্ম-
বেশে প্রবেশ করো উভমই করেছি ।
আহা ! এই পরমসুন্দরী বাগাটি যদি
রাজহুহিতা পদ্মাবতী হতো, তবে আর
আমার হৃথের সীমা থাকতো না ।

[প্রস্থান ।

দ্বিতীয় গর্ভাঙ্ক ।

মাহেশ্বরীপুরী—দেবালয় উদ্যান ।

(পুরোহিত এবং কক্কুর প্রবেশ ।)

পুরো । আহা, কি আক্ষেপের বিষয় ?
মহাশয়, যেমন ভগবতী ভাগীরথীকে দর্শন
কর্যে জগজ্জনগণ হিমাচলকে ধন্যবাদ করে,
রাজহুহিতা পদ্মাবতীকে দেখে সকলেই
আমাদের নরপতিকে তদ্রূপ পরম ভাগ্য-
বান্ বল্যে গণ্য কর্তো । হায়, কোন
দুর্দৈববিপাকে এ নিশ্চলসলিলা গঙ্গা যেন
অকস্মাৎ রোধপতনে পঙ্কিলা হয়ে উঠ-
লেন ?

কক্কু । দুর্দৈববিপাকই বটে । মহা-
শয় দেখুন, এ বিপুল ভারতভূমিতে প্রতি-
যুগে কতশত রাজগৃহে এই স্বয়ম্বর কার্য
মহাসমারোহে নিষ্পন্ন হয়েছে ; কিন্তু
কুত্রাপি ত এরূপ ব্যাঘাত কস্মিনকালেও
ঘটে নাই ?

পুরো । হায় ! এতটা অর্থ কি তবে
বুখাই ব্যয় হলো ?

কক্কু । মহাশয়, তন্নিমিত্তে আপনি
চিন্তিত হবেন না । দেখুন, যে অবল
সাগরকে শত-সহস্র নদ ও নদী বারিধরূপ
কর অনবরত প্রদান করে, তার অধুরাশির
কি কোন মতে হ্রাস হতে পারে ? তবে
কি না একটা বলঙ্ক চিরস্থায়ী হয়ে রৈল ।

পুরো । ভাল, কক্কুরী মহাশয়, রাজ-
কণ্ঠার স্বয়ম্বর-সমাজে উপস্থিত না হবার
মূল কারণটা কি তা আপনি বিশেষরূপে
কিছু অবগত আছেন ?

কক্কু । আজ্ঞা না, তবে আমি এইমাত্র
জানি, যে স্বয়ম্বর সভায় যাত্রাকালে, রাজ-
বালা, মুগ্ধমূর্ত্তি নৃচ্ছা প্রাপ্ত হয়ে, এতাদৃশী
দুর্কলা হয়ে পড়েছিলেন, যে রাজবৈদ্য

তাকে গৃহের বহির্গত হতে নিষেধ করেন, সুতরাং, স্বয়ম্বর কন্য়ার অনুপস্থিতিতে শুভলগ্ন ভ্রষ্ট হওয়ায়, রাজদল অকৃতকার্য হয়ে স্ব স্ব দেশে প্রস্থান কলোন।

পুরো। আহা, বিধাতার নিরক্ষর কে খণ্ডন কতে পারে? তা চলুন, আমরা এক্ষণে দেবদর্শন করিগে।

কবু। আজ চলুন।

[উভয়ের প্রস্থান।]

(সখী এবং পরিচারিকার প্রবেশ।)

সখী। কেমন—আমি বলেছিলাম কি না, যে এ স্বয়ম্বরে কোন না কোন একটা ব্যাঘাত অবশ্যই বটে উঠবে?

পরি। তাই ত? কি আশ্চর্য! তা রাজনন্দিনী যে একেবারে এমন হয়ে পড়বেন, তা কে জানতো?

সখী। আহা, প্রিয়সখীর দুঃখের কথা মনে হলে প্রাণ যে কেমন করে তা আর কি বলবো! (রোদন।)

পরি। ভাল, রাজনন্দিনী যে একেবারে এমন হয়ে পড়লেন, এর কারণ কি?

সখী। আর কারণ কি? প্রিয়সখী দ্বারে সপ্নে দেখে ভাল বাসেন, তিনি ত আর রাজা নন যে তাঁকে প্রিয়সখী পাবেন!

পরি। তা সত্য বটে। নেপথ্যাভিমুখে অবলোকন করিয়া) ওকে ও? ঐ না সেই বিদর্ভদেশের লোকটা এই দিকে আসছেন? উনি যে রাজনন্দিনীকে ভাল বাসেন, তার সন্দেহ নাই; তা এমন ভাল বাসায় ওঁর কি লাভ হবে? বামন হয়ে কি কেউ কখন চাঁদকে ধরতে পারে? চল আমরা ঐ মন্দিরের আড়ালে দাঁড়িয়ে দেখি উনি এখানে এসে কি করবেন।

সখী। চল।

[উভয়ের প্রস্থান।]

(ছদ্মবেশে রাজা ইন্দ্রনীলের প্রবেশ।)

রাজা। (স্বগত) আমার ত এ রাজধানীতে আর বিলম্ব করা কোনমতেই যুক্তিসিদ্ধ নয়। যত রাজগণ এ রূথা স্বয়ম্বরে এসেছিল, তারা সকলেই আপন আপন রাজ্যে প্রস্থান করেছে। কিন্তু আমি এ পরমসুন্দরী কন্য়াটিকে কি প্রকারে পরিত্যাগ করে যাই? (দীর্ঘনিশ্বাস) হে প্রভো অনঙ্গ, যেমন সুরেন্দ্র আপন বজ্রদ্বারা পদতরাজের পক্ষচ্ছেদ করে তাকে অচল করেছেন, তুমিও কি তোমার পুষ্পশরাঘাতে আমাকে তদ্রূপ গতিহীন কতে চাও? (চিন্তা করিয়া) এ স্ত্রীলোকটিকে কোনমতেই আমার রাজমহিষীপদে অভিষিক্ত করা যেতে পারে না। সিংহ সিংহীর সহিতই সহবাস করে। এ রাজবালা পদ্মাবতীর একজন সহচরী মাত্র, তা এর সহিত আমার কি সম্পর্ক? (দীর্ঘ নিশ্বাস) হে রতিদেবি, তুমি যে অমূল্যরত্ন আমাকে দান কতে চাও, সে রত্ন শচী এবং যক্ষেশ্বরীর ক্রোধে আমার পক্ষে অস্পর্শীয় অগ্নিশিখা হলো! হায়, এ পবিত্রা প্রবাহিনী কি তাঁদের অভিশাপে আমার পক্ষে কপ্পনাশানদী হয়ে উঠলো? তা আর রূথা আক্ষেপ কতে কি হবে? (সচকিতে নেপথ্যাভিমুখে অবলোকন করিয়া) এ কি?

নেপথ্যে। তুই বেটা কি সামান্য চোর। তুই যে দ্বিতীয় হনুমান।

ঐ। কেন? হনুমান কেন?

ঐ। কেন তা আবার জিজ্ঞাসা করিস? দেখ, দেখি—যেমন হনুমান রাবণের মণ্ডন ভেঙ্গে লগুভণ্ড করেছিল, তুইও আজ আমাদের মহারাজের সম্মতকলবনে সেইরূপ উৎপাত করেছিস। তা তোর মাথাটা কেটে ফেলাই উচিত।

ঐ। ঈস।

ঐ। বটে? দেও ত হে বেটাকে যা
তুই তিন লাগিয়ে দেও ত।

নেপথ্যে। দোহাই মহারাজের—
(বেগে কতিপয় রক্ষক সহিত বিদূষকের প্রবেশ।)

বিদু। মহারাজ, আপনি আমাকে
রক্ষা করুন।

রাজা। কেন, কি হয়েছে?

বিদু। মহারাজ, এ বেটারা সাক্ষাৎ
যমদূত।

প্রথম। ধর ত হে, বেটাকে ধরে,
বাঁধ।

বিদু। (রাজার পশ্চাত্তানে দণ্ডায়মান
হইয়া) ঈস। তোর কি যোগ্যতা যে
তুই আমাকে বাঁধবি? ওরে ছুটে রক্ষক,
তুই যদি কনকলঙ্কায় ঢুকতে চাস, তবে
আগে সমুদ্র পার হ। এই মহাত্মা বিদর্ভ-
দেশের অধিপতি রাজা ইন্দ্রনীল রায়।

রাজা। আরে কর কি।

বিদু। মহারাজ, আপনি যে কে, তা
না টের পেলে কি এ পাষাণ বেটারা
আমাকে অশ্বনি ছাড়বে? বাপ!

প্রথম। মহাশয়—

বিদু। মর বেটারাধম, তুই কাকে
মহাশয় বলিস রে?

রাজা। (বিদূষকের প্রতি) চুপ কর
হে—চুপ কর। (রক্ষকের প্রতি) রক্ষক,
তুমি কি বলছিলে?

প্রথম। মহাশয়—দেখুন। এ ঠাকুরটি
আমাদের মহারাজের অমৃতফলবনে যত
পাকা ফল ছিল প্রায় তা সব পেড়ে খেয়ে-
ছেন।

বিদু। খাবনা কেন? আমি
খাবনা ত আর কে খাবে? তুই বেটা
আমাকে হনুমান্ বল্যে গাল দিচ্ছিলি।
আচ্ছা, আমি যদি এখন হনুমানের মতন

তোদের পুরী পুড়িয়ে ভস্ম করো যাই, তবে
তুই আমার কি কতো পারিস?

রাজা। (জনাস্তিকে বিদূষকের প্রতি)
ও কি কতো পারে? কিন্তু অবশেষে তুমি
আপনার মুখ পোড়াবে। আর কি?

(কঙ্কুকা এবং পুরোহিতের পুনঃপ্রবেশ।)

প্রথম। (কঙ্কুকা এবং পুরোহিতের
সহিত একান্তে কথোপকথন)।

কঙ্কু। বল কি? (অগ্রসর হইয়া)

মহারাজের জয় হউক।

পুরো। মহারাজ চিরজীবী হউন।

কঙ্কু। রক্ষক, তুমি এ সংবাদ মহা-
রাজের নিকট অতি ত্বরায় লয়ে যাও।

প্রথম। যে আচ্ছা। তবে এই আমি
চল্লেম।

পুরো। মহারাজ, আপনার শুভাগমনে
এ রাজধানী অদ্য কৃতার্থ হলো।

কঙ্কু। হে নরেশ্বর, আপনার আর
এ স্থলে অবস্থিতি করা উচিত হয় না।
অনুগ্রহ করো রাজনিকেতনের দিকে পদা-
র্পণ করুন।

রাজা। (স্বপ্নত) এত দিনের পর
আজ সকলই সুখা হলো। (প্রকাশে)
চলুন। [সকলের প্রস্থান।

(সখী এবং পরিচারিকার পুনঃপ্রবেশ।)

সখী। হ্যালো মাধবি, এ আবার কি?
আমরা কি স্বপ্ন দেখছি, না এ বাজীকরের
বাজী?

পরি। ও মা, তাই ত! ঐ কি
রাজা ইন্দ্রনীল, যার কথা সকলেই কয়?

নেপথ্যে। (মঙ্গল বাদ্য ও জয়ধ্বনি)।

সখী। কি আশ্চর্য্য! চল, আমরা এ
সব কথা প্রিয়সখীকে বলিগে।

[উভয়ের প্রস্থান।

ইতি তৃতীয়াক্ষ।

চতুর্থাক্ষ ।

প্রথম গর্ভাক্ষ ।

বিদর্ভনগর—তোরণ ।

(সারথিবশে কলির প্রবেশ)

কলি । (স্বগত) আমি কলি ? এ বিপুল
বিপ্রে কে না কাঁপে শুনিয়া আমার নাম ?
সতত কুপথে গতি মোর ।

নলিনীরে সৃজেন বিধাতা—

জলতলে বসি আমি মৃগাল তাহার
হাসিয়া কণ্টকময় করি নিজবলে ।
শশাঙ্ক যে কলঙ্কী—সে আমার ইচ্ছায় !
ময়ূরের চন্দ্রক-কলাপ দেখি, রাগে
কদাকারে পা-দুখানি গড়ি তার আমি !

(পরিক্রমণ ।)

জন্ম মম দেবকুলে ;—অমৃতের সহ
গরল জন্মিয়াছিল সাগর-মথনে ।
ধর্ম্মাধর্ম্ম সকলি সমান মোর কাছে ।
পরের যাহাতে ঘটে বিপরীত, তাতে
হিত মোর ; পরদুঃখে সদা আমি সুখী ।

(চিন্তা করিয়া) এ বিদর্ভপুরে,—

নৃপতি রাজেন্দ্র ইন্দ্রনীল ; তার প্রতি
অতি প্রতিকূল এবে ইন্দ্রাণী সুন্দরী,
আর মুরজারূপসী, কুবের-রমণী ;—
এ দৌহার অনুরোধে, মায়া-জালে আমি
বেড়িয়াছি নৃপবরে, নিষাদ যেমতি
ঘেরে সিংহে ঘোরবনে ব্রধিতে তাহারে ।
মাহেশ্বরী পুরীর ঈশ্বর যজ্ঞসেন—

পদ্মাবতী নামে তার সুন্দরী নন্দিনী ;
ছদ্মবেশে বরি তারে রাজা ইন্দ্রনীল
আনিয়াছে নিজালয়ে ; এ সংবাদ আমি
ভাট-বেশে রটিয়া দিয়াছি দেশে দেশে ।

পৃথিবীর রাজকুল মহারোষে আমি
থানা দিয়া বসিয়াছে এ নগরদ্বারে—
নেপথে । (ধনুষ্ঠকার ও শঙ্খনাদ ।)

কলি । (স্বগত) ঐ শুন—
বীর দর্পে তা সবার সঙ্গে যুঝে এবে
ইন্দ্রনীল । (চিন্তা করিয়া)

এই অবসরে যদি আমি রাণী পদ্মাবতীরে
লইতে পারি হরি—

তা হলে কামনা মোর হবে ফলবতী ।

প্রেয়সী-বিরহ-শোকে ইন্দ্রনীল রায়
হারাইবে প্রাণ, ফণী মণি হারাইলে
মরে বিষাদে । এ হেতু সারথির বেশে
আসিয়াছি হেথা আমি । (পরিক্রমণ)
কি আশ্চর্য্য ! অহো—

এ রাজকুলের লক্ষ্মী মহা তেজস্বিনী !
এ'র তেজে এ পুরীতে প্রবেশ করিতে
অক্ষম কি হইলু হে ? (সহাস্যবদনে)
কেনই না হব ? অমৃত যে দেহে থাকে,
শমন কি কভু পারে তারে পরশিতে ?
দেখি, ভাগ্যক্রমে পাই যদি রাণীরে
এ তোরণসমীপে ।

(চতুর্দিক্ অবলোকন করিয়া সপুলকে)
একি ?

ওই না সে পদ্মাবতী ? আয় লো কামিনী—
এইরূপে কুরঙ্গিনী নিঃশঙ্কে অভাগা
পড়ে কিরাতে'র পথে ; এইরূপে সদা
বিহঙ্গী উড়িয়া সবে নিষাদের কাঁদে !
(চিন্তা করিয়া)

কিঞ্চিৎ কালের জগ্রে অদৃশ্য হইয়া
দেখি কি করা উচিত । (অন্তর্ধান) ।

(অবগুণ্ঠিকায়তা পদ্মাবতী এবং সখীর প্রবেশ ।)

সখী । প্রিয়সখি, এ সময়ে প্রাচীরের
বাইরে যাওয়া কোন মতেই উচিত হয় না ।
তা এসো আমরা এখানেই দাঁড়াই । আর
এ দিয়েও কই কেউ ত বড় যাওয়া

আসা কচ্যে না? এ এক প্রকার নির্জন স্থান ।

পদ্মা । (দীর্ঘনিশ্বাস পরিত্যাগ করিয়া)
সখি, আমার মতন হতভাগিনী কি আর
ছুটি আছে? দেখ, প্রাণেশ্বর আমার জন্তেই
কি ক্রেশই না পেলেন! আর এই যে
একটা ভয়ঙ্কর সময় আরম্ভ হয়েছে, যদি
ভগবতী পার্বতীর চরণপ্রসাদে এ হতে
আমরা নিস্তার পাই, তবুও যে কত
পতিহীনা স্ত্রী, কত পুত্র-হীনা জননী,
কত যে লোক আমার নাম শুনেই
শোকানলে দগ্ন হয়ে আমাকে যে কত অভি-
সম্পাত দেবে, তা কে বলতে পারে? হে
বিধাতঃ, তুমি আমার অদৃষ্টে যে সুখভোগ
লেখো নাই, আমি তার নিমিত্তে তোমাকে
তিরস্কার করি না, কিন্তু তুমি আমাকে পরের
সুখনাশিনী কল্যে কেন? (রোদন) ।

সখী । প্রিয়সখি, তুমি এমন কথা
মনেও করো না। তোমার জন্তেই যে
রাজারা কেবল যুদ্ধ করে মর্চে তা নয়।
এ পৃথিবীতে এমন কর্ম অনেক স্থানে হয়ে
গেছে। দ্রৌপদীর স্বয়ম্বরে কি হয়েছিল
তা কি তুমি শোননি?

পদ্মা । সখি, তুমি পাকালীর কথা
কেন কও? শশীর কলঙ্কে তাঁর শ্রীর হাস
না হয়ে বরঞ্চ বৃদ্ধি হয়।—

নেপথ্যে । (ধনুষ্টিকার ও হস্তারধনি
এবং রণবাদ্য) ।

পদ্মা! (সত্রাসে) উ, কি ভয়ঙ্কর
শব্দ? সখি, তুমি আমাকে ধর। এই দেখ
বীরদলের পায়ের ভরে বৃক্ষমতী যেন কেঁপে
কেঁপে উঠছেন ।

সখী । (আকাশমার্গে দৃষ্টিপাত করিয়া)
কি সর্কনাশ! প্রিয়সখি, দেখ আকাশ
থেকে যেন অগ্নিবৃষ্টি হচ্ছে। এমন অদ্ভুত
শব্দজাল ত আমি কখনও দেখি নাই।

পদ্মা । কি সর্কনাশ! সখি, আমার
কি হবে (রোদন) ।

সখী । প্রিয়সখি, তুমি কেঁদো না।
আর ভয় নাই, ঐ দেখ, যখন রাজসারথি
এই দিকে আসচে তখন বোধ হয় মহারাজ
অবশুই শত্রুদলকে পরাভব করে থাকবেন।

পদ্মা । (নেপথ্যাভিমুখে অবলোকন
করিয়া) কি সর্কনাশ! সারথি যে একলা
আসচে?

(সারথিবশে কলির পুনঃ প্রবেশ ।)

সারথি, তুমি যে রাজপথ ত্যাগ করে
আসচো?

কলি । মহিষি, আপনি এত উতলা
হবেন না। মহারাজ এ দাসকে আপনার
নিকটেই পাঠিয়েছেন।

পদ্মা । কেন? কি সংবাদ, তা তুমি
আমাকে শীঘ্র করে বল।

কলি । আজ্ঞা—সকলই সুসংবাদ,
মহারাজ অত্র এক রথে আরোহণ করে
আমাকে এই বল্যে আপনার নিকট
পাঠিয়েছেন, যে আপনি কিঞ্চিৎ কালের
জন্তে রাজপুরী ছেড়ে ঐ পার্বতের দুর্গে
গিয়ে থাকুন। আর এ দাসও নরবরের
আজ্ঞায় এই রথ এনেছে। তা দেবীর কি
আজ্ঞা হয়?

সখী । প্রিয়সখি, তুমি যে চূপ করে
রৈলে?

পদ্মা । (দীর্ঘনিশ্বাস পরিত্যাগ করিয়া,
সখি, আমি এ নগর ছেড়ে কেমন করে
যাই?—

নেপথ্যে । (ধনুষ্টিকার হস্তারধনি ও
রণবাদ্য ।)

সখী । উঃ! কি ভয়ঙ্কর শব্দ!
সারথি, কে, রথ কোথায়? তুমি আমাদের
শীঘ্র নিয়ে চল।

কলি ! (স্বগত) এ হতভাগিনীরও মরণেচ্ছা হলো না কি ? তা যে শিশিরবিন্দু পুষ্পদলে আশ্রয় লয়, সে কি সূর্য্যের প্রচণ্ড কিরণ হতে কখনও রক্ষা পেতে পারে ? (প্রকাশে) দেখি, তবে আসুন ।

পদ্মা । (স্বগত) হে আকাশমণ্ডল, তোমাকে লোকে শকবাহ বলে । তা তুমি এ দাসীর প্রতি অনুগ্রহ করো, আমার এই কথাগুলি আমার জীবিতনাথের কর্ণকুহরে সাবধানে লয়ে যাও । হে রাজন, তোমার পদ্মাবতী তোমার আজ্ঞা পালন কল্যে ; কিন্তু তার প্রাণটি এ রণক্ষেত্রে তোমার নিকটেই রৈল । দেখ, চাতকিনী বজ্র বিদ্যুৎ আর প্রবল বায়ুকেও ভয় না করো, জলধরের প্রসাদ প্রভাক্ষায় কেবল তার সম্মুখেই উড়তে থাকে ।

সখী । প্রিয়সখি ! চল । আমরা যাই ।

পদ্মা । (দীর্ঘনিশ্বাস পরিত্যাগ করিয়া) তবে চল ।

কলি । (স্বগত) গরুড় ভজঙ্গিনীকে ধরে উড়লেন ।

[সকলের অস্থান ।

(রক্তাক্তবস্ত্র পরিধানে ও রক্তাঙ্গ অসি হস্তে বিদূষকের প্রবেশ ।)

বিদু । (চতুর্দিক অবলোকন করিয়া স্বগত) রাম বল, বাঁচলেম । বেশ পালিয়েছি । আরে, আমি দরিদ্র ব্রাহ্মণ, আমার কি এ সকল ভাল লাগে ? তবে করি কি ? দৃষ্ট ক্ষত্রদলের সঙ্গে কেবল এ পোড়া পেটের জালায় সহবাস কতো হয় । তা একটু আদুট সাহস না দেখালে বেটারা নিতান্ত হেয় জ্ঞান করবে বলে, আমি এই খাঁড়াখানা নিয়ে বেরিয়েছি—যেন যুদ্ধ কতোই গিয়েছিলেম । আর এই যে রক্ত দেখছে, এ ত রক্ত নয় । এ—আলতা-

গোলা ! (উচ্চহাস) । এই যুদ্ধের কথা শুনে ব্রাহ্মণীর সিঁচুরচুপড়ি থেকে খানকতক আলতা চুরি করে টেকে গুঁজে রেখেছিলেম । আর কেন যে রেখেছিলেম তা সামান্য লোকের বুকে উঠা দুষ্কর । ওহে, যেমন সিংহের অস্ত্র দাঁত, ঘাঁড়ের অস্ত্র শিঙ, হাতীর অস্ত্র শৃঙ, পাখীর অস্ত্র ঠোঁট আর নখ, ক্ষত্রকুলের অস্ত্র ধনুর্কাণ, তেমনি ব্রাহ্মণের অস্ত্র—বিদ্যা আর বুদ্ধি । তা বিদ্যা বিষয়ে ত আমার ক অক্ষর গোমংস ; তবে কিনা একটু বুদ্ধি আছে । আর তা না থাকলে কি এত করে উঠতে পারতাম ? বল দেখি, আমার কাপড় আর এই খাঁড়া দেখে, কে না ভাববে যে আমি শত শত হাতী আর ঘোড়া আর যোদ্ধাদেরকে ঘরের বাড়ী পাঠিয়ে এসেছি (উচ্চহাস) । তা দেখি আজ মহারাজ এ বেশ দেখে আমাকে কি পুরস্কার করেন ? হে দৃষ্টে সরস্বতি, তুমি এসে আমার কাঁধে ভর কর, তা না কল্যে কস্ম চলবে না । আজ যে আমাকে কত মিথ্যাকথা কইতে হবে তার সংখ্যা নাই ।

(কতিপয় নাগরিকের প্রবেশ ।)

প্রথম । এই যে আৰ্য্য মানবক এখানে দাঁড়িয়ে রয়েছেন । মহাশয়, প্রণাম করি । (নিকটবর্তী হইয়া সচকিতে) ইঃ, এ কি ?

বিদু । কেন, কি হলো ?

প্রথম । মহাশয়, আপনার সর্কাস্ত্রে যে রক্ত দেখছি ?

বিদু । দেখবে না কেন ? ওহে, দোল দেখতে গেলে কি গায়ে আবার লাগে না ?

দ্বিতীয় । তবে মহাশয় রণক্ষেত্রে গিয়েছিলেন নাকি ?

বিদ্ । যাব না কেন ? কি হে, তুমি
কি ভেবেছো যে আমি একটা টোলের
ভট্টাচার্য্য—দেড়গজি সমাস ভিন্ন কথা কই
না, আর বিচার-সভাতেই কেবল ঘোণা-
চার্য্যের বীর্ঘ্য দেখাই, কিন্তু একটু মারা-
মারির গন্ধ পেলেই ব্রাহ্মণীর আচল
ধরে তার পেছন্দিকে গিয়ে লুকুই !
(উচ্চহাস) ।

দ্বিতীয় । না, না, তাও কি হয় ?
আপনি একজন মহা বীরপুরুষ । তা কি
সংবাদ, বলুন দেখি শুনি ?

বিদ্ । আর কি সংবাদ ? দেখ,
যেমন জমদগ্নির পুত্র ভীষ্ম—

প্রথম । মহাশয়, জমদগ্নির পুত্র ভৃগু-
রাম ।

বিদ্ । তাই ত ! তা এ গোলে কি
কিছু মনে থাকে হে ? দেখ, যেমন জম-
দগ্নির পুত্র ভৃগুরাম, পৃথিবীকে নিঃক-
ত্রিয়া করেছিলেন, এ ব্রাহ্মণও আজ তাই
করেছে ?

নেপথ্যে । (জয়বাদ্য) ।

প্রথম । এই যে মহারাজ, শত্রুদলকে
রুগস্থলে জয় করে ফিরে আস্চোন ।

নেপথ্যে । (মহারাজের জয় হটক) ।

তৃতীয় । চল হে, রাজদর্শনে যাওয়া
যাউক ।

নেপথ্যে । (বৈতালিকের গীত) ।

মাজ সুরট—একতাল ।।

কি রঙ্গ রাজভবনে, কি রঙ্গ আজ—
করিয়া রণ, শক্রনিধন, রাজনবর রাজে ।

পলকে সব হইল গগন,

উৎসবরত যত পুরজন,

জয় জয় রবপূর্ণ গগন, নৌবত ঘন বাজে ।

সৈন্ত সকল সমরকুশল,

নিরখি ভীত অরিদলবল,

কল্পিত হয় ধরণীতল, বাসুকি নত লাজে ।

ভূপতি অতি বীর্ঘ্যবান,
বিভবনিবহ সুরসমান,

ইন্দ্র যেন শোভমান, মর্ত্যভুবনমাঞ্জে ॥

নেপথ্যে । ওরে, একজন দৌড়ে
গিয়ে আর্ঘ্য মানবককে শীঘ্র ডেকে আনগে
তো । মহারাজ তাঁর অন্বেষণ কচোন ।

বিদ্ । ঐ শোন । দেখি মহারাজ
আমাকে আম্ কি শিরোপা দেন ।

[প্রশ্নান ।

প্রথম । এ ব্রাহ্মণ বেটা কি সামান্য
ধৃত গা ?

দ্বিতীয় । এমন নির্লজ্জ পুরুষ কি
আর পৃথিবীতে ছুটি আছে ?

তৃতীয় । তবে ও আনতা গোলা
বটে ?

প্রথম । তা বই কি ? ও কি আর
যুদ্ধক্ষেত্রে গিয়েছিলো ?

দ্বিতীয় । মহাশয়, চলুন রাজদর্শন
করিগে ।

প্রথম । চল ।

[সকলের প্রশ্নান ।

দ্বিতীয় গর্তাস্ক ।

পর্কত-শিখরস্থ গহন কানন ।

(কলির প্রবেশ ।)

কলি । (স্বগত)

এইত হরণ করি আনিবু রাণীরে
এইষোর কাননে : এবে কোথায় ইন্দ্রাণী ?

যে প্রতিজ্ঞা তাঁর কাঙ্ছ করেছিলু আমি,

রক্ষা করিয়াছি তাহা পরম কৌশলে,—

(কলির কৌশল কত হয় কি বিফল ?)

যাই এবে স্বর্গে (অবলোকন করিয়া)

অহো ! এই যে পোলোমী

মুরজার সঙ্গে—

(শচী এবং মুরজার প্রবেশ ।)

প্রকাশে) দেবি, আশীর্বাদ করি ।

শচী । প্রণাম । হে দেববর, কি করেছ, বল ?

কলি ।

পালিনু তোমার আজ্ঞা যতনে, ইন্দ্রাণী,
বিদায় করহ এবে ঘাই স্বর্গপুরে ।

শচী । (ব্যগ্রভাবে)

কোথায় রেখেছ তাকে ?

কলি । এই ঘোরবনে

সখীসহ আনি তারে রেখেছি, মহিষি ।

(সহাস্রবদনে) ।

রথে যবে তুলি দৌহে উঠিনু আকাশে,
কত যে কাঁদিল ধনী, করিল মিনতি,
সে সকল মনে হলে—হাঁসি আসে মুখে !

মুর । (স্বগত)

হেন দুরাচার আর আছে কি জগতে ?

(প্রকাশে) ভাল, কলিদেব,—

কিছু কি হলো না দয়া তোমার হৃদয়ে ?

কলি ।

সে কি, দেবি ? হরিণীরে নৃগেন্দ্রকেশরী
ধরে যবে, শুনি তার ক্রন্দনের ধ্বনি,
সদয় হইয়া সে কি ছাড়ি দেয় তারে ?

শচী । কলিদেব,—

শত ধন্যবাদ আমি করি গো তোমারে ।

শতকোটি প্রণাম তোমার ও চরণে !

বাঁচালে আমারে তুমি । তোমার প্রসাদে
রহিল আমার মান । অঙ্গুরীর দলে
যাহে প্রাণ চাহে তব, পাইবে তাহারে—

পাঠাইব তারে অমি তোমার আলায়ে,

রবিরে প্রদান যথা করয়ে সরসী

নব কমলিনী হাঁসি—নিশি অবসানে ।

যত রত্নরাজী আছে বৈজয়ন্ত-ধামে

তোমার সে সব । দেখ, আজি হতে শচী—

ত্রিদিবের দেবী—দেব, হলো তব দাসী ।

যাও চলি স্বর্গে এবে । শীঘ্র আসি আমি
যথোচিত পুরস্কারে তুষিব তোমারে ।

কলি । যে আজ্ঞা ! বিদায় তবে
হই আমি, সতি ।

[প্রস্থান ।

মুর । সখি, আমাদের কি এ ভালকর্ম
হলো ?

শচী । কেন ? মন্দ কর্মই বা কি ?

মুর । দেখ, আমরা পরের অপরাধে
এ সরলা মেয়েটিকে যাতনা দিতে প্রবৃত্ত
হলোম্ ।

শচী । আঃ, আর মিছে বকো কেন ?
তোমাকে আমি না হবতো প্রায় একশত
বার বলেছি যে স্বয়ং সৃষ্টিকর্তা বিধাতা
দুষ্টদমন করবার জন্তে সময় বিশেষে ভগ-
বতী বসুমতীকেও জলমগ্ন করেন । তা
ভগবতী বসুমতী কি স্বদোষে সে যজ্ঞনা
ভোগ করেন ?

মুর । তা আমি কেমন করে বলবো ?
(চতুর্দিক অবলোকন করিয়া) । একবার
ঐ দিকে চেয়ে দেখ দেখি, সখি ।

শচী । কি ?

মুর । সখি, ঐ পর্বতশৃঙ্গের অন্তরাল
থেকে এ দিকে কে আসচে দেখ তো ?
আহা ! একি ভগবতী ভাগীরথী হরিদ্বার
হতে বেরুচোন ? এমন অপরূপ রূপ-
লাবণ্য ত আমি কোথাও দেখি নাই ।

শচী । ঐ সেই পদ্মাবতী ।

মুর । সখি, ওর মুখখানি দেখলে
বোধ হয়, যেন আমি ওকে আরও
কোথাও দেখেছি । (স্বগত) একি ?
আমার স্তনধর যে সহসা দুক্কে পরিপূর্ণ
হলো ? হে হৃদয়, তুমি এত চঞ্চল হলো
কেন ?

শচী । সখি, চল আমরা পুনরায়
কলিদেবের নিকটে যাই ।

মূর। কেন ?

শচী। চল না কেন ? আমার মন-
স্ফামনা এখন সম্পূর্ণরূপে সফল হয় নাই।

মূর। সখি, আমার মন কলিদেবের
নিকটে আর কোন মতেই যেতে চায় না।
আমি অলকার চলোম্।

[প্রস্থান।

শচী। (স্বগত) তুমি গেলেই বা ?
তোমার দ্বারা যত উপকার হতো পারবে,
তা আমি বিশেষরূপে জানি। তা যাই—
আমি একলাই কলিদেবের নিকটে যাই।
ইন্দ্রনীল যেন স্নয়স্বরসংগ্রামে হত হয়েছে,
এইরূপ একটা মিথ্যাশোষণা রটিয়ে দিলে
আরও ভাল হবে।

[প্রস্থান।

(পদ্মাবতীর প্রবেশ।)

পদ্মা। (স্বগত) হায় ! এ বিপজ্জাল
হতে আমাকে কে রক্ষা করবে। এ কি
কোন দেব, না দেবী, এ হতভাগিনীর
প্রতি বাম হয়ে একে এত যন্ত্রণা
দিতে প্রবৃত্ত হলোন। (চতুর্দিক
অবলোকন করিয়া) কি ভয়ঙ্কর স্থান !
বেগ হন যেন যামিনীদেবী দিবা-
ভাগে এই নিভৃতস্থলেই বিরাজ করেন।
(দীর্ঘনিশ্বাস পরিত্যাগ করিয়া) হে প্রাণে-
শ্বর, যেমন রঘুনাথ ভগবতী জানকীকে
বিনাদোষে বনবাস দিয়েছিলেন, আপনিও
কি এ দাসীর প্রতি প্রতিকূল হয়ে তাই
কল্যোন্। হে জীবিতেশ্বর, আপনি যে
আমাকে পৃথিবীর সুখভোগে নিরাশ
কল্যোন, তাতে আমার কিছু মনোবেদনা
হয় না, তবে যাবজ্জীবন আমার এই একটা
দুঃখ রৈলো, যে আপনাকে আমি বিপদ-
সাগর থেকে উত্তীর্ণ হতে দেখতে পেলেম্
না। (রোদন) হায় ! আমার কি হবে ?
আমাকে কে রক্ষা করবে ? (পরিক্রমণ ও

পর্কভের প্রতি লক্ষ্য করিয়া) হে গিরিবর,
এ অনাথা আপনার নিকট আশ্রয় চায়, তা
আপনার কি আজ্ঞা হয় ? (চিন্তা করিয়া)
আপনি যে নিস্তদ্ধ হয়ে রৈলেন ? তা
থাক্বেন বৈ আর কি ? হে নগরাজ,
এ পৃথিবীতে যে ব্যক্তি মহান হয়, তার
ক্ষুদ্রলোকের প্রতি এইরূপই ব্যবহার বটে।
আপনি সিংহের নিনাদ শুনলে তৎক্ষণাৎ
তার প্রত্যুত্তর দেন,—মেঘের গর্জনে পুন-
র্গর্জন করেন,—বজ্রের শব্দে অস্থির হয়ে
হত্কার ধ্বনি করেন ;—আমি অবলা
মানবী, তা আপনি আমার প্রতি কৃপাদৃষ্টি
করবেন কেন ? (রোদন) কি আশ্চর্য্য !
এ এমনি গহনবন, যে এখানে আমার
আপনার শব্দ শুনলেও ভয় হয়। হায় !
আমি এখন কোথায় যাব ? বসুমতী যে
এখনও আস্চে না।

(কদলীপাত্রে জল লইয়া সখীর প্রবেশ।)

সখী। প্রিয়সখি, এই নাও। আঃ !
এ জলের অবেষণে যে আমি কত দূর
ঘুরেছি, তার আর কি বলবো ?

পদ্মা। (জলপান করিয়া) সখি,
আমি তোমাকে ব্যথা ক্রেশ দিলেম্ বৈ ত
নয়। হায় ! এ জলে কি এ পাপ প্রাণের
তৃষ্ণা দূর হবে ? (রোদন)।

সখী। প্রিয়সখি, এ পর্কতপ্রদেশ কি
ভয়ঙ্কর স্থান !

পদ্মা। কেন ? কেন ?

সখী। উঃ ! আমি যে কত সিংহ, কত
বাঘ, কত মহিষ, কত ভালুক, আর কত যে
বরাহের পারের চিহ্ন দেখেছি, তা মনে হলে
বুক শুকিয়ে উঠে ! প্রিয়সখি, এ ঘোর
গহন বনে আমাদের আর কে রক্ষা করবে।
(রোদন)।

পদ্মা। (সখীর হস্ত ধারণ করিয়া)

সখি, আমি যে প্রাণনাথের নিকটে কি অপরাধ করেছি, তা আমার এখনও স্মরণ হচ্ছে না। কিন্তু তিনি কি আমার প্রতি একেবারে এত নির্দয় হলেন, যে এ হতভাগিনীকে যারা ভালবাসে, তাদের উপরও তাঁর রাগ হলো ? (রোদন)।

সখী। প্রিয়সখি, তুমি আমার জন্তে কেঁদো না।

পদ্মা। সখি, তুমিও কি আমার দোষে মারা পড়বে ? (রোদন)।

সখী। (সজল নয়নে পদ্মাবতীকে আলিঙ্গন করিয়া) প্রিয়সখি, আমি কি তোমার জন্তে মরতে ডরাই ! আমি যদি আমার প্রাণ দিয়ে তোমাকে এ বিপজ্জ্বাল হত্যে উদ্ধার করতে পারি, তবে আমি তা এখনই দিতে প্রস্তুত আছি। (রোদন)।

পদ্মা। (দীর্ঘনিশ্বাস পরিত্যাগ করিয়া) হে বিধাতঃ ! তুমি যদি এ তরুনীকে অকূল সমুদ্রমধ্যে মগ্ন করবার নিমিত্তেই নিশ্চয় করেছিলে, তবে তুমি একে জনপূর্ণ করো ভাসালে কেন ? (রোদন)।

সখী। প্রিয়সখি, তুমি আমার জন্তে কেঁদো না। (রোদন)।

পদ্মা। সখি, এসো, আমরা এখানে বসি। আমাদের কপালে যদি মরণ থাকে, তবে আমরা একত্রেই মরবো ! (শিলাতলে উভয়ের উপবেশন)।

সখী। প্রিয়সখি, এ দুষ্ট সারথি যে আমাদের সঙ্গে এমন অসৎ ব্যবহার করবে, তা আমি স্বপ্নেও জানতেম্ না।

পদ্মা। (দীর্ঘনিশ্বাস পরিত্যাগ করিয়া) সখি, তার দোষ কি ? সে এক জন ভৃত্য বই ত নয়।

নেপথ্যে। রে অর্বোধ প্রাণ ! তুই যদি এ ভগ্ন কারাগার স্বরূপ দেহ রণভূমিতেই

পরিত্যাগ কর্তিস, তা হলে ত তোকে আর এ যন্ত্রণা সহ কতো হতো না ! হায় !—

পদ্মা। (সত্রাসে) একি ? (উভয়ের গাত্রোথান)।

সখী। (নেপথ্যাভিমুখে অবলোকন করিয়া সত্রাসে) তাই ত প্রিয়সখি, বোধ করি এ কোন মায়াবী রাক্ষস হবে ! হে জগদীশ্বর, আমাদের এখন কে রক্ষা করবে ?

(ক্ষতযোদ্ধার বেগে কলির পুনঃপ্রবেশ)।

কলি। আপনারা দেবকণ্ঠাই হউন, কি মানবই হউন, আমার এ স্থলে সহসা প্রবেশে বিরক্ত হবেন না। হায় ! যেমন হস্তী সিংহের প্রচণ্ড আঘাতে ব্যথিত হয়ে কোন পক্ষত গহ্বরে ত্রাসে পলায়ন করে, আমিও তদ্রূপ এই স্থলে এসে উপস্থিত হলাম।

সখী। (ব্যগ্রভাবে) কেন ? আপনার কি হয়েছে ?

কলি। আমি বীরচূড়ামণি রাজা ইন্দ্রনীলের একজন যোদ্ধা। তাঁর শত্রুদলের সঙ্গে ঘোরতর সমর করে এই দুর্বস্থায় পড়েছি।

পদ্মা। (ব্যগ্রভাবে) মহাশয়, রণক্ষেত্রের সংবাদ কি ?

কলি। (দীর্ঘনিশ্বাস পরিত্যাগ করিয়া) হায় ! দেবি, আপনি ও কথা আর আমাকে কেন জিজ্ঞাসা করেন ? প্রবল শত্রুদল মহারাজকে সসৈন্তে নিপাত করে, বিদর্ভনগরীকে ভস্মরাশি করেছে।

পদ্মা। অ্যা ! আপনি কি বল্যেন ?

সখী। এ কি ? প্রিয়সখি যে সহসা পাণ্ডুবর্ণা হয়ে উঠলেন ?

পদ্মা। (অচেতন হইয়া ভূতলে পতন)।

সখী। (পদ্মাবতীকে ক্রোড়ে ধারণ করিয়া) হায় ! প্রিয়সখী যে অচেতন হয়ে

পড়লেন । মহাশয়, ঐ পক্ষতন্ত্রের ঐ দিকে একটা নিকর আছে, আপনি অনুগ্রহ করে ওখানথেকে একটু জল আনলে বড় উপকার হয় । ইনি একজন সামান্য স্ত্রী নন ! ইনি রাজমহিষী পদ্মাবতী ।

কলি । (স্বগত) যেমন কালসর্প আপন শত্রুকে দংশন করে বিবরে প্রবেশ করে, আমিও তদ্রূপ আপন অভীষ্টসিদ্ধি করে স্বস্থানে প্রস্থান করি । (প্রকাশে) এই আমি চল্লেম ।

[প্রস্থান ।

সখী । (স্বগত) হায়, এ কি হলো ? (আকাশে কোমল বাদ্য) এ কি ? আকাশে

(গীত)

[সুর—মঃ]

আর কি কব তোমারে ?

যেজন পীরিতে রত, সুখ দুঃখ সহে কত,
পরেরি তরে ।

সুধাকর প্রেমাধিনী, অতি সুখী চকোরিণী ;

কভু হয় বিষাদিনী বিরহ শরে !

নলিনী ভানুর বশে, মগন প্রণয়-রসে,

তথাপি কখন ভাসে, বিষাদ নীরে !

প্রেম সমভাব নহে, কভু সুখভোগে রহে,

কভু বা বিরহ দহে, নয়ন ঝরে ॥

(কাষ্ঠচ্ছেদিকা বেশে রতিদেবীর প্রবেশ ।)

রতি । (স্বগত) হায় ! দেবকুলে শচীর মতন চণ্ডালিনী কি আর আছে ? আহা ! সে যে ছুঁ কলির সহকারে রাজমহিষী পদ্মাবতীকে কহু কেশ দিতে আরম্ভ করেছে, তা মনে হলে হৃদয় বিদীর্ণ হয় । তা আমার এখন কি করা উচিত ? (চিন্তা করিয়া) এই চিত্রকূট পর্বতের নিকটে তমসা নদাতীরে অনেক মহিষী সম্পরিবারে বাস করেন, তা পদ্মাবতী আর

বহুমতীকে কোন মূনির আশ্রমে লয়ে যাওয়াই উচিত । তার পরে আমি কৈলাস-পুরীতে ভগবতী পার্বতীর নিকট এ সকল বৃত্তান্ত নিবেদন করবো । তিনি এ বিষয়ে মনোযোগ কল্যে আর কোন ভয়ই থাকবে না । যে দেশ গঙ্গাদেবীর স্পর্শে পবিত্র হয়েছে, সে দেশে কি কেউ তৃষ্ণাপীড়া ভোগ করে ? (অগসর হইয়া প্রকাশে) ও গো, তোমরা কারা গা ?

সখী । তুমি কে ?

রতি । আমি এই পর্বতে কাটু কুড়ুতে এসেছি, তোমরা এখানে কি কচ্যো ?

সখী । দেখ, আমার প্রিয়সখী অচেতন হয়ে রয়েছেন, তা তুমি একটু জল এনে দিতে পারো ?

রতি । অচেতন হয়েছেন ? তা জলে কাজ কি ? আমি ওঁকে এখনই ভাল করে দিচ্ছি । (পদ্মাবতীর গাত্রে হস্ত প্রদান) ।

পদ্মা । (চেতন পাইয়া দীর্ঘনিশ্বাস পরিত্যাগ)

রতি । দেখ, এই তোমার সখী চেতন পেলেন ।

পদ্মা । (গাত্রোখান করিয়া) সখি, আমি যে এক অদ্ভুত স্বপ্ন দেখেছি, তার কথা আর কি বলবো ?

সখী । প্রিয়সখি, কি স্বপ্ন ?

পদ্মা । আমার বোধ হলো যেন একটা পরমসুন্দরী দেবকণ্ঠা আমার মস্তকে তাঁর পদ্মহস্ত বুলিয়ে বলোন, বৎসে, তুমি শাস্ত হও । তোমার প্রাণনাথের সঙ্গে নীত্ৰই তোমার মিলন হবে । (রতিকে অবলোকন করিয়া সখীর প্রতি) সখি, এ স্ত্রীলোকটি কে ?

সখী । প্রিয়সখি, এ এক জম কাটু-রিয়াদের মেয়ে ।

রতি । ইয়া গা, তোমাদের কি এখানে থাকতে ভয় হয় না ?

পদ্মা । কেন ?

রতি । এ পাহাড়ে যে কত সিংহ, কত ভালুক, আর কত যে সাপ থাকে, তা কি তোমরা জান না ?

সখী । (সত্রাসে) কি সর্সনাশ ! এ পাহাড়ের নাম কি গা !

রতি । এর নাম চিত্রকূট ।

পদ্মা । এখান থেকে বিদর্ভনগর কত দূর তা তুমি জান ?

রতি । বিদর্ভনগর এখান থেকে অনেক দিনের পথ । কেন তোমরা কি সেখানে যেতে চাও ?

পদ্মা । (স্বগত) হায় ! সে বিদর্ভনগর কি আর আছে ! হে প্রাণেশ্বর, তুমি এ হতভাগিনীকে কেন সঙ্গে করো নিলে না ? (রোদন) ।

রতি । (সখীর প্রতি) তোমার প্রিয়-সখী কাঁদেন কেন ? ঠাঁর যদি এখানে থাকতে ভয় হয়, তবে তোমরা আমার সঙ্গে এসো ।

সখী । তুমি আমাদের কোথায় নিয়ে যাবে ?

রতি । এই পাহাড়ের কাছে অনেক উপস্রীরা বসতি করেন, তা তাঁদের কারো আশ্রমে গেলে তোমাদের আর কোন ক্লেশই থাকবে না ।

সখী । (পদ্মাবতীর প্রতি) প্রিয়সখি, তুমি কি বল ? আমার বিবেচনার এখানে আর এক মুহূর্তের জঞ্জোও থাকা উচিত হয় না ।

পদ্মা । সখি, তোমার যা ইচ্ছা ।

সখী । তবে চল । ওগো কাটরেদের মেয়ে, তুমি আমাদের পথ দেখিয়ে দাও ত ?

রতি । এই দিকে এস ।

[সকলের প্রস্থান ।

তৃতীয় গভাস্ক ।

বিদর্ভনগরস্থ—রাজগৃহ ।

(রাজা ইক্ষনীল স্থান ও মৌনভাবে আসীন, মন্ত্রী ।)

মন্ত্রী । (স্বগত) প্রায় সপ্তাহ হলো, রাজ্ঞী পদ্মাবতী, সখী বসুমতীর সহিত রাজপুরী পরিত্যাগ করো যে কোথায় গেছেন, তার কোন অনুসন্ধানই পাওয়া যাচ্ছে না ! (দীর্ঘনিশ্বাস পরিত্যাগ করিয়া) আহা ! মহীপাল অধুনা রাজমহিষীর প্রাপ্তি বিষয়ে প্রায় নিরাশ্বাস হয়ে নিরাহারে এবং অনিদ্রায় দিনযামিনী যাপন করেন ; আর আপনার নিত্যকার্যের প্রতি তিল-ক্ষের নিমিত্তেও মনোযোগ করেন না । হায় ! মহারাজের হৃদশা দেখলে হৃদয় বিদীর্ণ হয় । হে বিধাতঃ ! তোমার এ কি সামান্য বিড়ম্বনা ! তুমি কি এ দয়া-সিন্ধুকেও বাড়বানলে তাপিত কল্যে,—এ করতরুকেও দাবানলে দগ্ধ কল্যে—এ প্রতাপশালী আদিত্যকেও দুষ্টি রাহুর গ্রাসে নিক্ষিপ্ত কল্যে ? (চিন্তা করিয়া) তা আমার আর এস্থলে অপেক্ষা করবার কোন প্রয়োজন নাই । প্রায় দুই দণ্ডাবধি আমি এস্থলে দণ্ডায়মান আছি, কিন্তু মহারাজ আমার প্রতি একবার দৃকপাতও কল্যে না । (নেপথ্যাভিমুখে অবলোকন করিয়া) এই যে আর্ষা পানবক এদিকে আগমন কল্যে । তা দেখি এর দ্বারা কোন ? উপকার হতে পারেকি না

(বিদূষকের প্রবেশ ।)

বিদু । (মন্ত্রীর প্রতি) মহাশয়, আপনি অনুগ্রহ করে এখান থেকে কিঞ্চিৎকালের

জগৎ প্রশ্ৰুত করুন। দেখি, আমি মহা-
রাজের এ মৌনব্রত ভঙ্গ কতে পারি
কি না।

মন্ত্রী। যে আজ্ঞা, তবে আমি যাই।

[প্রস্থান।

বিদ্। (স্বগত) হায়! প্রিয় বয়স্হের
এ দুরবস্থা দেখে আর এক মুহূর্তের জন্তেও
ঘাচতে ইচ্ছা করে না। ইঁ রে দারুণ
বিধি, তোর মনে কি এই ছিল? (চিন্তা
করিয়া) প্রিয় বয়স্হের সঙ্গীতে চিরকাল
অনুরাগ, আর না হবেই বা কেন? ঋতু-
রাজ বসন্তই কোকিলকে সমাদর করেন।
এই জন্তে আমি রাজমহিষীর কয়েক জন
সুগায়িকা সহচরীকে এখানে এনেছি।
দেখি, এদের সুপরে প্রিয়বয়স্হের চিত্ত-
বিনোদ হয় কি না? (নেপথ্যাভিমুখে
জনাস্তিকে) কেমন নিপুণিকে, তোমরা
সকলে ত প্রস্তুত হয়েছে? (কর্ণদিয়া)
ভাল! তবে আরম্ভ কর দেখি?

নেপথ্যে। (বহুবিধ যন্ত্রের মৃদুধ্বনি)।

বিদ্। (নেপথ্যাভিমুখে জনাস্তিকে)
আহা! কি মনোহর ধ্বনি! তা এখন
একটা উত্তম গান গাও দেখি?

নেপথ্যে। (গীত)

(বারঙা—চুঁরা।)

পিরীতি পরম রতন।

বিরহে পারে কি কভু হরিতে সে ধন ॥
কমলে কণ্টক থাকে,তবু ভাল বাসে লোকে,
কে তাজে বিচ্ছেদ দেখে প্রেম আকিঞ্চন।
মিলন বিচ্ছেদ পরে, দ্বিগুণ সুখের তরে,
যথা অমা-নিশান্তরে, শশীর শোভন ॥

রাজা। (দীর্ঘনিশ্বাস পরিত্যাগ
করিয়া) সখে মানবক্—

বিদ্। (সহর্ষে) মহারাজের জয়
হউক।

রাজা। (গাত্তোখান করিয়া) সখে,
যে কুসুমকানন দাবানলে দগ্ধ হয়ে গেছে,
তাতে জলসেচন করা বৃথা পরিশ্রম বৈ ত
নয়।

বিদ্। বয়স্হ, বিধাতা না করেন যে
এমন সুকুম-কাননে দাবানল প্রবেশ
করে।

রাজা। সে যা হোক, সখে, তুমি
আমাকে চিরবাধিত কল্যে। দেখ, আগ্নেয়-
গিরির উপরে মেঘদল বারি বর্ষণ কল্যে,
যদ্যপিও তার অন্তরিত হতাশন নিষ্কাশন না
হয়, তত্রাচ তার অঙ্গের জ্বালার অনেক
হাস হয়। তুমি আমার মনোরঞ্জনের
নিমিত্তে কি না কচ্যো?

বিদ্। বয়স্হ, সাগর উখলিত হল্যে
যে কত জীবের জীবন সংশয় হয়, তা কি
আপনি জানেন না? তা আপনি একটু
সুস্থির হল্যে আমরা সকলেই পরম সুখ
লাভ করি।

রাজা। (দীর্ঘনিশ্বাস পরিত্যাগ করিয়া)
সখে, এমন প্রবল ঝড় বহুত আরম্ভ কল্যে,
কি সাগর স্থির হয়ে থাকতে পারে? দেখ,
যে শোকশেলে দেবদেব মহাদেব, এবং
স্বয়ং বিষ্ণু অবতার রঘুপতিও ব্যথিত
হয়েছিলেন, তার প্রচণ্ড আঘাতে আমি
অতি ক্ষুদ্র মানব কি প্রকারে স্থির হতে
পারি? (চিন্তা ও দীর্ঘনিশ্বাস পরিত্যাগ
করিয়া) হে বিধাতঃ! তোমার কি কিছু-
মাত্র বিবেচনা নাই? যে হলাহল স্বয়ং
নীলকণ্ঠের দেহ দাহন করেছিল, তাই তুমি
আমাকে পান করালো?

বিদ্। (স্বগত) আহা! প্রিয়বয়স্হের
খেদোক্তি শুনলে বুক ফেটে যায়! হায় রে
নিষ্ঠুর বিধি! তোর মনে কি এই ছিল?

রাজা। কি আশ্চর্য্য! সখে, এ সুবর্ণা
লতাটা যে আমার হৃদয়ভূমি থেকে কোন্

মুর। (দীর্ঘনিশ্বাস পরিত্যাগ করিয়া)
ভগবতী বহুকরা বিজয়াকে প্রসব করে
শ্রীপর্কতের উপর কমলকাননে রেখেছিলেন,
পরে রাজা যজ্ঞসেন ঐ স্থলে মৃগয়া কতো
গিয়ে, তাকে পেয়ে আপনার পাটেশ্বরীর
হাতে লালনপালনের জন্ম দিয়ে-
ছিল। হায়! হায়! বাছা, চিত্রকূট-
পর্কতের উপর তোমার চন্দানন দেখে
আমার স্তনদ্রব দুকে পরিপূর্ণ হয়েছিল,
তা আমি তোমাকে তাতেও চিন্লেমু না?
(রোদন)।

শচী। সখি, তুমি শান্ত হও।

আকাশে। (বীণাধ্বনি)।

শচী। এ কি? (আকাশমার্গে
দৃষ্টিপাত করিয়া) এই যে দেবর্ষি নারদ
এই দিকে আসছেন। সখি, তুমি সাবধান
হও, এই বৃর্ত্ত ব্রাহ্মণই এ বিপদের মূল;
দেখো—ও যেন আবার কন্দল বাধাতে না
পারে।

(নারদের প্রবেশ)।

উভয়ে। ভগবন, আমরা আপনাকে
মতিবাদন করি।

নার। আপনাদের কল্যাণ হউক।

শচী। দেবর্ষি, সংবাদ কি? আজ্ঞা
করুন দেখি?

নার। দেবি, সকলই সুসংবাদ!
ভগবতী পার্শ্বতী আমাকে অদ্য আপনাদের
নমীপে প্রেরণ করেছেন।

শচী। কেন? ভগবতীর কি আজ্ঞা?

নার। তিনি শুনেছেন যে আপনারা
মাকি বিদর্ভনগরের রাজা পরম শিবভক্ত
ইন্দ্রনীলরায়কে কলিদেবের সাহায্যে নানা
ক্লেশ দিতে প্রবৃত্ত হয়েছেন।—

শচী। ভগবন, তা ভগবতী পার্শ্ব-
তীকে এ কথা কে বললে?

নার। ভগবতী এ কথা রতিদেবীর
মুখেই শ্রবণ করেছেন।

শচী। (স্বগত) কি সর্ম্মনাশ! এ
দৃষ্টা রতির কি কিছুমাত্র লজ্জা নাই?
এমন কথাও কি মহেশ্বরীর কর্ণগোচর করা
উচিত। (প্রকাশে) দেবর্ষি, তা ভগবতী
এ কথা শুনে কি আদেশ করেছেন?

নার। ভগবতীর এই ইচ্ছা যে আপ-
নারা এ বিষয়ে ক্ষান্ত হয়েন।

শচী। ভাল, তা যেন হলোম্।
কিন্তু এখন পদ্মাবতীই বা কোথায়,
আর ইন্দ্রনীলই বা কোথায়—তা কে
জানে?

নার। (সহস্রবদনে) তন্নিমিত্তে
আপনি চিন্তিত হবেন না। রাজমহিষী
পদ্মাবতী এক্ষণে তমসানদীতীরে মহর্ষি
অঙ্গিরার আশ্রমে বাস কচ্যেৎ।

শচী। (স্বগত) হায়! আমার এত
পরিশ্রম কি তবে ব্যথা হলো? আর অব-
শেষে রতিই জিতলে! তা করি কি? ভগ-
বতী গিরিজার আজ্ঞা উল্লঙ্ঘন করা কার
সাধ্য। শ্রোতস্বতীর পথ রুদ্ধ কতো কে
পারে?

নার। আমি মহাদেবীর আঙ্কানু-
সারে যতীন্দ্র অঙ্গিরার আশ্রমে গমন কতো
আকাজ্জনা করি, অতএব আপনারা
আমাকে এক্ষণে বিদায় করুন।

মুর। ভগবন, আপনি আমাকে
সেখানে সঙ্গে লয়ে চলুন।

শচী। চলুন, আমিও আপনাদের
সঙ্গে যাই। (রত্নার প্রতি) রত্না, তুই
এখন অমরাবতীতে যা। আমি একবার
যোগীবর অঙ্গিরার আশ্রম থেকে
আসি।

রত্না। যে আজ্ঞা।

[নারদ, শচী, এবং মুরজার প্রস্থান।

আমি আর এখানে একলা থেকে কি করবো ? যাই, দেখিগে নন্দনকাননে এখন কি হচে।

[প্রস্থান ।

দ্বিতীয় গর্ভাঙ্ক ।

তমসানদীতীরে মহর্ষি অঙ্গিরার আশ্রম ।

(পদ্মাবতী এবং গৌতমীর প্রবেশ ।)

গৌতম । বৎসে, তুমি এত অধীর হইও না ! তোমার প্রাণেশ্বর অতি ভয়-যাই তোমার নিকটে আসবেন, তার কোন সন্দেহ নাই । ভগবান অঙ্গিরা তোমার এ প্রতিকূল দৈবশাস্তির নিমিত্তে এক মহা-যজ্ঞ আরম্ভ করেছেন—

পদ্মা । ভগবতি, আমি কি সে শ্রীচরণের আর এজন্মে দর্শন পাব । (রোদন) ।

গৌতম । বৎসে, তুমি শান্ত হও, মহর্ষির যজ্ঞ কখনই নিষ্ফল হবার নয় !

পদ্মা । ভগবতি, আপনি যা আজ্ঞা কচোন সে সকলই সত্য, কিন্তু আমি এ নির্যাস প্রাণকে কেমন করে প্রবোধ দি । হায় ! এ কি আর এখন কোন কথা মানে ? (রোদন) ।

গৌতম । বৎসে, বিবেচনা করে দেখ, এ অখিল ব্রহ্মাণ্ড কোন বস্তুই চিরকাল শ্রীলঙ্ক হরো থাকে না । বর্ষার সমাপ্তিতে জলহীন নদী জলবতী হয়,—কতুরাজসমস্ত বিরাজমান হলো, লতাকুল মুকুলিতা ও ফলবতী হয়,—কৃষ্ণপক্ষে শশীর মনোরম কাণ্ডির হ্রাস হয় বটে; কিন্তু আবার শুক্লপক্ষে তার পূরণ হয়,—তা তোমারও এ যাতনা অতি শীঘ্রই দূর হবে ।

নেপথ্যে । তো শাস্ত্রবর, ভগবতী গৌতমী কোথায় হে ! দেখ, দুইজন অতিথি

এসে এ আশ্রমে উপস্থিত হয়েছে, অতএব তাদের যথাবিধি আতিথ্য কর ।

গৌতম । বৎসে, এক্ষণে আমি বিদায় হলোম্ । তুমি এই তরুর ছায়ায় কিঞ্চিৎ-কালের নিমিত্তে বিশ্রাম কর । দেখ ! ভগবতী তমসার নিখল সলিলে কমলিনী কি অনির্কচনীয় শোভাই ধারণ করো বিকশিত হয়েছে, তা তোমার বিরহরজনীও প্রায় অবমান হয়ে এলো ।

[প্রস্থান ।

পদ্মা । (স্বগত) প্রাণেশ্বর যে সংগ্রামে বিজয়ী হয়েছেন, তার আর কোন সন্দেহ নাই, কিন্তু এ হতভাগিনীকে কি আর তাঁর মনে আছে ? (দীর্ঘনিশ্বাস পরিত্যাগ করিয়া) হে বিধাতঃ ! আমি পূর্বজন্মে এমন কি পাপ করেছিলেম যে তুমি আমাকে এত দুঃখ দিলে । তুমি আমাকে রাজেন্দ্রনন্দিনী, রাজেন্দ্রগৃহিণী করেও আবার অনাথা যুথলষ্টা কুরঙ্গিণীর মতন বনে বনে ফেরালে । (রোদন) ।

নেপথ্যে ! প্রিয়সখি, কে, তুমি কোথায় ?

পদ্মা । (নেপথ্যাভিমুখে দৃষ্টিপাত করিয়া) কেন ? এই যে আমি এখানেই আছি ।

(বেগে সখীর প্রবেশ ।)

সখী । প্রিয়সখি—(রোদন) ।

পদ্মা । (ব্যগ্রভাবে সখীকে আনিঙ্গন করিয়া) এ কি ? কেন ? কেন সখি, কি হয়েছে ?

সখী । (নিরুত্তরে রোদন) ।

পদ্মা । সখি, কি হয়েছে তা তুমি আমাকে শীঘ্র করে বল ?

সখী । প্রিয়সখি, মহারাজ আর্ঘ্য মানবকের সঙ্গে এই আশ্রমে এসে উপস্থিত হয়েছেন ।

পদ্মা । (অভিমান সহকারে) সখি, তুমিও কি আবার আমার সঙ্গে চাতুরী কতো আরম্ভ করলে ?

সখী । সে কি ? প্রিয়সখি, আমি কি তা কখন পারি ? ঐ দেখ, ভগবতী গৌতমী মহারাজ আর আৰ্য্য মানবককে লয়ে এদিকে আসছেন । কেমন, আমি সত্য না মিথ্যা বলেছি ? (নেপথ্যাভি- মুখে অবলোকন করিয়া) আহা ! মহা- রাজের মুখখানি দেখলে বোধ হয় যে উনি তোমার বিরহে অতি দুঃখে কালযাপন করেছেন ।

পদ্মা । (নেপথ্যাভিমুখে অবলোকন করিয়া) কি আশ্চর্য্য ! সখি, তাইত । বিবাতা কি তবে এত দিনের পর আমার প্রতি যথার্থই অনুকূল হলেন । (রাজার প্রতি লক্ষ্য করিয়া) হে জীবিতেশ্বর, আপ- নার কি এত দিনের পর এ অভাগিনী বলো মনে পড়লো ? (রোদন) ।

সখী । প্রিয়সখি, চল, আমরা ঐ বৃক্ষবাটিকার গিয়ে দাঁড়াই । মহারাজকে তোমার সহসা দর্শন দেওয়া উচিত হয় না ।

[উভয়ের প্রস্থান ।

(রাজা ও বিদুষকের সহিত গৌতমীর পুনঃপ্রবেশ ।)

গোত । হে নরেশ্বর, তার পর কি হলো ?

রাজা । ভগবতি, তার পর আমি রাজমহিষীর কোনই অব্বেষণ না পেয়ে যে কি পর্য্যন্ত ব্যাকুল হলোম, তা আর আপ- নাকে কি বলবো ! আর এ দুঃখ শোক- নল সহ কতো অক্ষম হয়ে, রাজমহিষীর উপর রাজ্যভার অর্পণ করে, এই আমার চির- প্রিয় বয়স্কের সহিত তীর্থ পর্য্যটনে যাত্রা কলোম ।

গোত ! হে নবনাথ, আপনি এ বিষয়ে

আর উদ্বিগ্ন হবেন না । রাজমহিষী এই আশ্রমে আছেন । মহর্ষি অঙ্গিরা তাঁকে আপন দুহিতার গায় পরম স্নেহ করেন । আর তাঁর আগমনাবধি বহুযত্নে তাঁর রক্ষণা- বেষ্টন করেছেন ।

রাজা । ভগবতি, সে সকল বৃত্তান্ত আমি দেবর্ষি নারদের মুখে বিশেষরূপে শ্রুত আছি । কুলায়ভ্রষ্টা পদ্মাবতী আশ্রম আশায় কোন বিশাল বৃক্ষের সমীপে গমন কলো, তরুণের কি শরণদানে পরাজুথ হয়ে, তাকে নিরাশ করেন ? ভগবান্ অঙ্গিরা ঋষিকুলের চূড়ামণি, তা তিনি যে এরূপ ব্যবহার করবেন, এ কিছু বড় অসম্ভব নয় ।

গোত । হে পৃথ্বীশ্বর, আপনি এই শিলাতলে ক্ষণেককাল উপবেশন করুন ; আমি গিয়ে রাজমহিষীকে এখানে লয়ে আসি ।

রাজা । ভগবতি, আপনার যা আচ্ছা ।

গোত । আর আপনার এ আশ্রমে শুভাগমনের সংবাদও মহর্ষির নিকট প্রেরণ করা উচিত । অতএব আমি কিঞ্চিৎ- কালের নিমিত্তে বিদায় হলোম ।

[প্রস্থান ।

রাজা । (উপবেশন করিয়া) সখে, যেমন তপনতাপে তাপিত জন সূশীতল তরুচ্ছায়া পেলে পূর্কতাপ বিস্মৃত হয়, আমারও আজ অবিকল, তাই হলো ।

বিদ্ । আচ্ছা, তার আর সন্দেহ কি ? এত দিনের পর আমাদের ডিঙ্গাখানি ঘাটে এসে লাগলো । কিন্তু এ ঘাটটা আমাকে বড় ভাল লাগছে না ।

রাজা । কেন, বল দেখি ?

বিদ্ ! বয়স্ক, এ মূনির আশ্রম, এখানে সকলেই হবিষ্য করে ; তা আমরাও কি একাহারী হয়ে আবার মারা পড়বো ?

রাজা । কেন ? তুমি ত আর সন্ন্যাস-
ধর্ম অবলম্বন কর নাই, যে তোমাকে একা-
হারে থাকতে হবে ?

আকাশে । (কোমল বাদ্য) ।

রাজা । (গাত্রোখান করিয়া সচ-
কিতে) এ কি ? আহা ! কি মধুর ধ্বনি !
সখে, আমি যে দিন মায়ামগ্নের অনু-
সরণ করে বিক্র্যাচলে দেব-উপবনে
উপস্থিত হয়েছিলেম, সে দিনও
আকাশে এইরূপ কোমল বাদ্য শুনে-
ছিলেম ।

বিদ্ব । (নেপথ্যাভিমুখে অবলোকন
করিয়া সত্যমে) কি সর্কনাশ !

রাজা । কেন ? কি হলো ?

বিদ্ব । মহারাজ, চলুন, আমরা এখান
থেকে পালাই । ঐ দেখুন, এ আশ্রমবনে
দাবানল লেপেছে । উঃ ! কি ভয়ঙ্কর
শিখা ।

রাজা । (অবলোকন করিয়া) সখে,
ও ত দাবানল নয় ।

বিদ্ব । বলেন কি ? মহারাজ, ঐ
দেখুন সব গাছপালা একবারে যেন ধূ ধূ
করে জ্বলে উঠছে ।

রাজা । কি হে সখে, তুমি অন্ধ হলে
নাকি ?

বিদ্ব । বয়স, তবে ও কি ?

রাজা । ওঁরা সকল দেবকন্যা তা
ওঁরাও অগ্নিশিখার মতন তেজস্বিনী বটেন ।
(অবলোকন করিয়া সানন্দে) কি আশ্চর্য্য !
এই যে শচীদেবী, যক্ষেশ্বরী, আর রতি-
দেবী আমার প্রেয়সীকে লয়ে এ দিকে
আসছেন । হে হৃদয় ! তুমি যে এতদিন
এ পূর্ণশশীর অদর্শনে বিদীর্ণ হও নাই,
এই আশ্চর্য্য ! (অগ্রসর হইয়া) এ দাস
আপনাদিগের শ্রীচরণে প্রণাম করিয়া ।
(প্রণাম) ।

(শচী, মুরজা, রতি, গৌতমী, পদ্মাবতী, সখী,
নারদ, এবং অগ্নির প্রবেশ ।)

সকলে । মহারাজের জয় হউক ।

নার । হে মহীপতে ! যেমন মহর্ষি
বাল্মীকির পুণ্যাশ্রমে দাশরথি ভগবতী
বৈদেহীকে প্রাপ্ত হন, আপনিও অদ্য
তদ্রূপ মহিষী পদ্মাবতীকে এই স্থলে লাভ
কল্যেন ।

অগ্নি । হে নরশ্রেষ্ঠ ! আপনার বাহ-
বলে ঋষিকুলের সর্কত্রই কুশল । অতএব
আপনি পুরস্কারস্বরূপ এই স্ত্রী-রত্নটী গ্রহণ
করুন ।

শচী । (রাজার হস্তে পদ্মাবতীর
হস্ত প্রদান করিয়া) হে নরনাথ, আপনি
অদ্যাবধি নিশ্চলচিত্তে বাতস্যহতোপায়ে
প্রবৃত্ত হউন ।

আকাশে ।

(গীত)

(বেহাড়া—পোস্ত)

সুমতি ভূপতি অতি,
তুমি ওহে মহারাজ ।
সুখে থাক ধনে মানে,
রিপুগণে দিয়ে লাজ ।
পাইলে হারা নিধি,
প্রিয়তমা পুনরায়,
বাসনা পূর্ণ হলো,
সুখে কর রাজকাজ ।
হয়ে সুবিচারে রত,
কর বহু যশোলাভ ।
যেমন শোভে ক্ষিতি,
তরাপতি দ্বিজরাজ ॥

(পুষ্পবৃষ্টি)

সকলে । রাজমহিষী চিরবিজয়ী হউন ।

নার । (রাজার প্রতি)

আমিও আশীষ করি, ওন নরপতি ।—

সুখে সদা কর বাস গ্রবনীমণ্ডলে,
 পরাভবি শত্রুদলে, মিত্রকূলে পালি,
 ধর্মপথগামী যথা ধর্মের নন্দন
 পৌরব । চরমে লভ স্বর্গ ধর্মবলে ।
 (পদ্মাবতীর প্রতি)
 যশঃসরে চিররুচি কমলিনীরূপে
 শোভ তুমি পদ্মাবতি—রাজেশ্বরনন্দিনি,

যযাতির প্রণয়িনী দৈত্যরাজবানী
 শশ্মিষ্ঠা যেমতি । তার সহ নাম তব
 গাঁথুক গোড়ীয়জন কাব্যরহহারে,
 মুকুতা সহ মুকুতা গাঁথে লোক যথা ।
 যবনিকা পতন ।

গল্প সমাপ্ত ।

